



**Ladres Bidze 2025**  
**GOVERNMAN SESEL**

**Delivre par:**

**Minis Naadir Hassan**

**MINIS POUR FINANS, PLANIFIKASYON NASYONAL EK KOMERS**

**Dan Lasanble Nasyonal Sesel**

**Ile Du Port, Victoria, Mahe, Seychelles**

**Zedi le 31 Oktob 2024**

**Msye Spiker,  
Dirizan Lopoziyon,  
Dirizan Zafer Gouvernman,  
Tou Manm Onorab e  
Tou dimoun a lekout,  
Bonzour.**

### **1. Lentrodiksyon**

Msye Spiker, Bidze 2025, i senkyenm bidze ki sa Ladministrasyon i prezante devan Lasanble Nasyonal pour laprouvasyon depi ki in antre dan Gouvernman an Oktob 2020.

Anvi ki sa i dernyen bidze dan sa manda i enportan pour mwan fer rapel tou dimoun lo bann lobzektif prensipal sa gouvernman ler i ti prezant son premye bidze an 2021. Sa ti lans son program pour sa 5 an dan son premye manda. Mon ti komans mon diskour bidze 2021 avek sa deklarasyon e mon site "I bon note ki sa nouvo gouvernman in pran ansarz sa pei dan enn son moman pli difisil dan son listwar. Me kanmenm sa, nou determinen e mon asire, ki nou pei pou sirviv tou sa bann defi. Me nou pa pou zis sirviv, me osi pozisyonn li dan en pli bon fason pou relanse e prospere".

Msye Spiker, ozordi i moman apropiye pour nou reflekte lo sa deklarasyon. Wi, mon kapab konfirmen ki nou'n sirviv, e nou pe menm fer pli byen. Dan bann bidze presedan dan sa bann dernyen lannen nou'n kapab amelyor bokou benefis pour nou pei e nou pep e menm entrodwir nouvo linisyativ ki pou anmenn nou pei devan e anmenn plis benefis.

Nou lekonomi in rekipere e avek stabilite makro ekonomik ki'n ganny re-etabli, sa in permet nou pou retourn bann benefis kot nou pep.

Msye Spiker, mon menm kapab dir ki bokou nou in menm fini bliye ki sa sitiasyon grav nou lekonomi e pei ti ladan. Sa dan limenm i laprev sa sikse ki nou'n pas atraver. Covid ti'n met nou lekonomi lo son zenou. Avek en lekonomi ki ti dan resesyon e sitiasyon finansyel gouvernman ki pa ti dan en bon kondisyon nou ti lo en presipis.

Me, ozordi nou dan en sitiasyon kot nou kapab prezant pli gro bidze dan listwar Sesel. Msye Spiker sa in arive dan mwens ki 5 an. En bidze ki donn ek nou pep benefis nou travay e osi met disponib larzan pou investir dan lenfrastruktir ekonomik ek sosyal ki a benefisyen nou pei pour sa bann lannen e deseni ki pe vini.

Sa Msye Spiker, i selman kapab arive ler i anan en gouvènmàn ki responsab e ki annan en plan stratejik. Me pli enportan en gouvènmàn ki fermeman kwar dan abilite son bann teknisyen pou delivre.

Msye Spiker les mwan fer rapel tou dimoun realite 2020 avek bann sif.

- Lekonomi ti'n regrese par 7.7%
- Defisit Fiskal Primer ti; 15.1% nou Prodwi Domestik Brit (GDP)
- Valer rounpi ti'n devalye konpare avek lezot lamonnen prensipal – Pour en 1 dolar ou ti bezwen plis ki SR22 – 1 Ero ti plis ki SR26 e 1 Liv Sterlen ti pros SR29.
- Avek lakantite touris ki ti'n desann, reveni direk ki pei ti gannye avek sa lendistri ti selman \$221 milyon, en rediksyon 62%.
- Dan son evalyasyon alafen lannen 2020, Fitch Rating ti degrad pozisyon nou pei sorti 'BB' komansman lannen pou ariv 'B', akòz det pei ti pe ariv lo en staz ki ti nepli soutenab.
- Ver milye 2021 to lenflasyon ti'n ariv an mwayenn par lao 11%.
- Reveni total ki gouvènmàn ti kolekte lafen 2020 ti apepre SR 7.6 bilyon.
- Me parkont, depans total gouvènmàn, ansanm avek 'net lending', ekskli lentere, ti ariv en pti pe plis ki SR 10.9 bilyon.
- En total defisit primer SR 3.3 bilyon.
- Nou det total baze lo revizyon GDP ti 80.8%.

Avek en sitiasyon finansyel parey gouvènmàn ti'n pran li plis det.

Nou statistik ofisyel i montre ki zis an 2020 tousel, det total ki gouvènmàn ti pran ti plis ki SR7.5 bilyon, sa i enkli det domestik ek eksteryer.

Msye Spiker, vwala vre sitiasyon ekonomik ek finansyel pei an 2020. I enportan pour nou pa zanmen oubliye kote nou ti ete, e ki mannyer sitiasyon ti kritik, ler nou ti vin o pouvwar. Nou pann zanmen kasyet realite avek lepep Seselwa. Sa de premye lannen apre nou ti vinn opouvwar ti vreman difisil e enkyetan pour gouvènmàn, akòz tou le zour, nou ti pe rode ki mannyer pou fer fas avek sa pandemik COVID 19, e anmenmtan relans nou lekonomi.

Desizyon brav ti ganny pran pou vaksin nou popilasyon e re-ouver lafrontyer pei an Mars 2021. Sa ti lesel fason pou retourn nou lekonomi lo semen produktivite.

Msye Spiker, tou desizyon ki nou gouvènmman in pran ziska la, in fer li dan lentere tou dimoun, biznes e nou pei. I pour sa rezon ki nou premye bidze an 2021 ti enn baze lo met fondasyon pou anmenn transformasyon dan nou fason fer, e asire ki nou sitiasyon finansyel i revin stab e ki nou det pei i retourn lo en semen soutenabilite. Sa fondasyon i kontinyen reste labaz okenn bidze ki nou gouvènmman pou prepare.

Alors, ki aksyon ki nou'n pran koman en gouvènmman ziska la, pou retir nou pei dan sa difikilte ki i ti ladan e sipòrt nou popilasyon?

Msye Spiker, nou'n aplik en polisi bidzeter strikt. Nou'n reste disiplin e responsab a tou moman. Eski sa bann mezir ti toultan popiler? NON! Eski sa bann mezir ti nesese e enportan? WI! Sa ki mon kapab reasir tou Seselwa se SI sa bann mezir pa ti'n ganny pran, nou pei Sesel ti pou dan en sitiasyon kritik parey nou'n war arive dan plizyer pei.

Mon oule osi reasir tou Seselwa ki pandan sa dernyen katran nou pann zis kontrol depans. Ler sa bann mezir in konmans rapòrt fri, nou'n partaze e sa nou'n fer li avek tou kous nou sosyete – ki enkli sektè biznes, etidyan, travayer e osi sa ki bezwen plis sipòr atraver bann program benefis sosyal. Nou'n kontinyen fer devlopman lo nivo distrik, e envestir dan lenfrastriktir. Nou'n distribye sa sikse avek bann diferan group sakenn a son tour.

Msye Spiker, pour nou reisir fer tousala, nou'n bezwen redres nou lekonomi ek sitiasyon finansyel.

Ozordi, nou sitiasyon i konm swivan:

- Lekonomi i ekspekte agrandi par 3% lafen 2024.
- Bidze pei i nepli dan defisit, me plito nou pe prozekte pou fer en sirplis fiskal primer 1.1% pour sa lannen.
- Nou ekspekte fini lannen avek en det total 61.5% nou GDP.
- Valer roupi in apresye kont bann deviz etranzer e stabilize.
- Lakantite reveni ki nou'n kolekte avek lendistri tourizm alafen 2023 ti \$989 milyon.
- Ozordi, Fitch Rating in reviz nou pozisyon, e nou pou fini lannen avek en 'rating' 'BB-, Outlook Positive'. Pli bon pozisyon ki nou'n deza gannyen.

- Alafen 2024, nou pe ekspekte kolekte en total reveni pou SR10.9 bilyon. Pli o ki nou'n deza kolekte.
- Depans total gouvènmman an 2024, ansanm avek 'net lending', ekskli lantere, i ekspekte ariv SR10.5 bilyon.

Sa bon rezilta ki mon'n fek site Msye Spiker, i rezilta travay dir tou dimoun, en pep rezilyan e matir, ki'n konpran ler gouvènmman ti bezwen pran bann aksyon disiplin e responsab pou retoun nou pei lo bon semen.

Ozordi dan sa senkyenm bidze, Msye Spiker, nou pou kontinyen rekonpans nou pep, baze lo nou abilite bidzeter, akoz nou lekonomi i ankor pe fer byen, malgre bann defi mondyal ki toultan reste en konsern pour nou. Me sa bidze Msyer Spiker i osi met fondasyon pour nou lekonomi kontinyen agrandir e sa i vedir ki a kree plis larises pour nou sitwayen.

## **2. Devlopman lo nivo mondyal e Performans Ekonomik Sesel**

Msye Spiker, zisteman, ler nou regard aktivite ekonomik lo nivo mondyal pour lannen 2024 menm si i reste rezilyan, konpare avek bann peryod dan lepase, sa i ankor en performans pli ba. Nou touzour pe fer fas avek bann defi ki pe persiste lo kote tansyon politik e osi lo kote polisi moneter. Krwasans mondyal i ekspekte pou stabilize anviron 3% pour lannen 2024 e 2025. Menm si to lenflasyon pe ralanti, presyon lo pri i reste eleve. Bann risks prensipal ki nou toultan bezwen pran an kont ki kapab annan lefe advers lo Sesel i sitiasyon finansyel lo kote mondyal, lager ant Ikrenn ek Larisi ki pe persiste, konfli dan Mwayenn Orian e lefe lenteripsyon dan komers.

Msye Spiker, lo kote domestik, nou ekspekte ki nou lekonomi pou agrandi par 3% an 2024. Sa i baze lo performans sektor tourizm ki'n reste pozitiv avek en ogmantasyon 2% dan larive viziter konpare avek 2023 e nou pe prozekte total viziter pou ariv 357,900. Baze lo sa prozeksyon performans viziter, krwasans i osi pe prozekte dan bann sektor relye avek tourism - parey akomodasyon e manze, e osi transportasyon e stokaz. Sa performans pe osi ganny siporte avek sa bon performans dan sektor lenformasyon ek telekominikasyon e osi sektor lagrikiltir ek lapas.

Pour lannen 2025, nou pe prozekte ki lekonomi Sesel pou agrandi par 4.3%. Sa i relye avek en ogmantasyon dan larive viziter par 3.5%, letan nou konsider bann faktor parey levennman 'FIFA Beach Soccer World Cup' ki pou fer an Me 2025, e

osi bann lotel ki pou re-ouver lannen prosenn. Bann sektor relye avek tourizm, parey akomodasyon e manze e servis administrativ e siport, nou pe prozekte en krwasans 5% e 3% respektivman pour lannen 2025.

Msye Spiker, dan lede sektor - lagrikiltir avek lapas - nou pe prozekte en krwasans 3% an 2025. Dan sektor prodiksyon prodwi pwason, nou pe estimen ki pou annan en krwasans 8% an 2025 e an mwayenn 3% dan mwayen term.

Dan sektor prodiksyon lalkol ek taba, nou pe prozekte en krwasans 4% pour lannen 2025 konpare avek 2% an 2024. Parkont, nou pe estimen ki pou annan en rediksyon 5% dan sektor materyo konstriksyon an 2024. Sa rediksyon i baze lo lenpak leksplozyon ki ti arive le 7 Desanm 2023. Sepandan, nou pe prevwar en relansman 3% dan sa sektor pour lannen 2025.

De lot kote, nou pe kontinyen vwar en krwasans pozitiv dan sektor konstriksyon anvi bann aktivite konstriksyon dan sektor tourizm. Sa krwasans pozitiv pe osi ganny vwar dan koleksyon reveni dan taks valer azoute pou sektor konstriksyon kin deza sirpas koleksyon antye pour lannen 2023 par 37 pousan. Sa sektor i ekspekte agrandi par 5% an 2025 e 3% dan mwayen term.

Sektor distribisyon e 'retail' pe ekspekte en krwasans 2% an 2024 e 3% an 2025.

Msye Spiker, dan sektor lenformasyon ek telekominikasyon en krwasans 10% pe ganny prozekte pour lannen 2024 e osi an 2025. Statistik pour 'data traffic' pour premye 6 mwan pandan 2024 in ogmante par 54% konpare avek menm peryod pour 2023. Sa krwasans pe osi ganny siporte avek zefor gouvrenman pou adopte teknolozi dan son bann servis e osi sa krwasans pozitiv dan sektor tourizm. An mwayen term sa sektor i ekspekte agrandi par 8%.

### **3. Sektor Moneter**

Msye Spiker, anvi ki lenflasyon lo nivo mondyal in abese pandan lannen, e dan lekonomi domestik to lenflasyon ti tre ba, Labank Santral Sesel in mentenir en polisi moneter akomodativ pou ede siport plis aktivite ekonomik. Dan sa konteks, to Polisi Moneter ti an Avril 2024 ganny redwir sorti 2.0% pour vin 1.75%.

An zeneral, lakantite kredi ki'n ganny donnen an rounpi, e ki'n al anver sektor prive, in ogmante pandan sa lannen. An Out 2024, lakantite kredi in ogmant par 15%

konpare avek Out 2023. Sa i reflekte en lanvironnman pli favorab pour bann biznes.

Msye Spiker, an term devlopman lo marse eksteryer, menm si plizyer labank santral aletranze in fer desann zot to Lentere Polisi Moneter, i ankor annan bokou lensertitid relye avek bann tansyon e konfli politik ki kapab enpakte lekonomi domestik lannen prosenn. Alor, Labank Santral pou kontinyen pran kont bann faktor domestik ek eksteryer ler i fer desizyon, pou fer sir ki son polisi moneter i anliny avek son bann lobzektif.

#### **4. Lenflasyon**

Msye Spiker, nivo lenflasyon i ankor vremen ba kot to lenflasyon lo en baz douz mwan ti *negativ* 0.7% an Septanm 2024. Ler nou konpare avek Desanm 2021, pri an zeneral lo en baz douz mwan ti 9.8%. Sa abesman dan nivo lenflasyon depi lafen lannen 2021, ti prensipalman relye avek rediksyon dan pri komodite ek karbiran lo marse enternasyonal ensi ki en apresyasyon dan valer rounpi pandan sa menm peryod.

An Septanm 2024, pri an zeneral ti ogmant par 0.6% konpare avek Septanm 2023. An term prozeksyon pour Desanm 2024, lenflasyon i ekspekte a en to 2.5%. Dapre Fon Moneter Enternasyonal, to lenflasyon an mwayenn lo nivo global pou 5.8% e dan bann pei ki pe devlope, i pou 2.6%.

#### **5. Sektè Eksteryer**

Msye Spiker, lo kote sektè eksteryer, dan balans ‘current account’, ki rikord valer tranzaksyon ki Sesel i fer avek larestan lemonn, estimasyon preliminar i montre ki sa defisit in sorti 7.2% nou GDP an 2023, pou ariv 10.7% an 2024.

Me toudmenm, anlinny avek prozeksyon, i ekspekte annan en amelyorasyon dan performans lekonomi an 2025, e sa pou fer ki nivo defisit pou redwir pou vin 9.8% nou GDP.

#### **6. Revi lo Performans Fiskal 2024**

Msye Spiker, pour lannen 2024 pozisyon primer fiskal gouvènmman i reste 1.1% nou GDP parey prozeksyon inisyal e osi dan revi milye lannen. Nou pe estimen ki reveni total, ki pa enkli bann don - pou ariv SR 10.54 bilyon konpare avek SR

10.48 bilyon, dan prozeksyon bidze inisyal pour 2024. Sa i reprezant SR 58.7 milyon an plis ek bidze inisyal. Total reveni ki osi enkli bann don pour SR 10.9 bilyon, ki ekivalan 35.1% nou GDP.

Dan sa SR 10.9 bilyon - i enkli reveni taks ki pour en sonm SR 8.92 bilyon. Sa i SR 17.8 milyon an plis konpare avek sa ki nou ti'n prevwar pandan revi bidze milye lannen. Nou pe prozekte en ogmantasyon – prensipalman - dan koleksyon taks lo saler e benefis non-moneter par SR 28.7 milyon e taks biznes par SR 24 milyon. Par kont, nou pe prozekte en rediksyon dan bann laliny taks ki relye ek tourizm, sa i; taks lo valer azoute - par SR 30.9 milyon, taks lanvironnman soutenabilite lo bann viziter - par SR 15.2 milyon e taks lo reveni lotel - par SR 27.4 milyon.

Swivan, legzersis pandan revi milye lannen, gouvènmman ti prezant en bidze siplemanter SR 473.1 milyon. Sa, ti ganny finanse par en rediksyon dan depans dan bidze, pour en sonm SR 453.3 milyon e en ogmantasyon selman SR 19.8 milyon dan depans gouvènmman.

Nou ekspekte pou fini lannen 2024 avek en stok det lavalèr 61.5% GDP. Nou stok i ankor soutenab, e gard nou lo sa semen, ki nou a kapab realiz nou target pou redwir nou det ver 50% avan 2030.

## **7. Bidze 2025 e Performans Fiskal Mwayen Term**

Msyè Spiker, pour lannen 2025, gouvènmman pe propoz en depans SR 11,901,621,045. Sa i reprezant en ogmantasyon 11.9%, ler ou konpar avek 'Appropriation Act' 2024, ki ti SR 10,640,628,966.

Total reveni ki osi enkli bann don pe ganny prozekte pou ariv SR 12.2 bilyon, ki ekivalan 36.8% nou GDP.

Alors, sa i fer ki gouvènmman pe prozekte en sirplis primer SR 379.9 milyon ki reprezant 1.1% GDP. Dan mwayen term, nou pou kontinyen konsolid nou pozisyon fiskal e fer sir nou kontinyen atenn en sirplis primer ki ava ed nou dan nou target pour redwir nou det.



## **8. Koleksyon Reveni pour 2025**

Msye Spiker, dan sa total reveni ki nou pe prozekte pour lannen 2025, SR 9.96 bilyon pou ganny kolekte par bann reveni taks ki reprezant 85% koleksyon reveni total. Par kont, SR 1.8 bilyon pe ganny prozekte pour reveni ki pa taks e SR 453 milyon an term don. Sa total i reprezant en ogmantasyon SR 1.3 bilyon oubyen 11.7% ler ou konpar avek bidze revize pour lannen 2024.

Koleksyon dan reveni taks pe ganny prozekte pou ogmante dan taks lo saler e benefis non-moneter par SR 102 milyon. Sa i an rezilta re-ouvertir bann lotel ki pou kree plis lanplwa e osi ogmantasyon dan saler pour lannen 2025. Nou osi ekspekte en ogmantasyon dan koleksyon reveni dan Taks Biznes - par SR 161.9 milyon ki relye avek sekter finansyel an rapor avek antite 'securities dealers'. Pou annan en ogmantasyon dan 'Excise' Taks - par SR 130.3 milyon e Taks Valer Azoute (VAT) - par SR 570.4 milyon ki relye avek aktivite dan sekter tourizm.

Koleksyon lezot reveni ki pa taks pour lannen 2025, i ekspekte ogmante par SR 134.2 milyon. Mazorite sa ogmantasyon pou ganny kolekte koman en 'dividend' sorti kot IDC baze lo sa lagreman pou 'lease' zil Assumption pour en lavaler US\$ 20 milyon. Alors nou pou reflekte SR 301.4 milyon ogmantasyon dan 'dividend' sorti kot IDC. Gouvernman pou pret IDC en total SR 105.7 milyon anba depans dan 'net lending' pou permet li konstrir bann lenfrastruktir nesese lo sa zil, ki i pou repeye dan mwayen term.

Bann don ki nou pou gannye i ekspekte ogmante par apepre SR 98.3 milyon. Dan mwayen term, reveni total ek bann don in prozekte pou ariv apepre 33% nou 'GDP'.

## **9. Labaz Depans Gouvernman**

Msye Spiker, pour lannen 2025, gouvernman i reste angaze pou kontinyelman investir dan nou program sosyal e lenfrastruktir tout an prenan kont nou bann polisi fiskal. Bidze total pour portfolyo Lanplwa e Zafer Sosyal - ki enkli depans anba bann benefis e program kot Lazans Proteksyon Sosyal i pli gro sonm dan bidze 2025 - pour en total SR 1.57 bilyon - ki reprezant 13.2% bidze total ki pe ganny propoze. Bidze portfolyo Lasante pe ganny prozekte pour en total SR 1.5 bilyon ki reprezant 12.8% bidze total. En alokasyon SR 1.4 bilyon pe ganny prozekte pour portfolyo Ledikasyon ki reprezant 11.8% bidze total.

Bidze byen ek servis i reste pli gro sonm dan bidze 2025 avek en total SR 4.05 bilyon, ki reprezant 12.3% GDP, konpare avek bidze revize an 2024 ki reprezant 12.5% GDP.

Par kont Msye Spiker, pli gran ogmantasyon i pou en total bidze SR 1.86 bilyon ki pe ganny prozekte pour lannen 2025, i dan program lenvestisman kapital, ki reprezant 5.6% GDP. Sa i reprezant en ogmantasyon SR 473.1 milyon ouswa 34%, konpare avek bidze revize an 2024. Sa i reflekte priyorite gouvènmman pou konsolid bidze byen ek servis ki'n ede annan plis lespas fiskal pou envestir dan proze kapital.

## **10. Reminerasyon ek Saler**

Msye Spiker, nou gouvènmman in toultan pare pou redistribye nou sikse ler i kapab, sirtou apre bann moman difisil. I fer sa, baze lo kalkilasyon bidzeter pou asire ki sa redistribisyon i ekitab e soutenab. I pa vo lapenn ki nou redistribye nou larises ler nou konnen ki a lon-term pei pa pou kapab soutenir bann tel aksyon, ki kapab andomaz nou lekonomi e sitiasyon finansyel. Nou'n toultan dir ki nou pou toultan azir dan en fason disiplin e responsab.

Depi premye Bidze sa Ladministrasyon, an 2021, nou'n toultan rod fason pou redonnen ler bidze i permet. Pour travayer sekter piblik, an Avril 2023, gouvènmman, ti donn en ogmantasyon saler kot zot ti garanti en minimonm SR 1,000 par travayer. Sa ti swiv sa legzerzis pou konsolid serten alawens dan saler, e avek sa konsolidasyon travayer pe osi benefisye plis anver peyman trezyenm mwan. Msye Spiker, sa revizyon an 2023 ti reprezant en ogmantasyon an mwayenn 10%, e in kout gouvènmman apepre SR 220 milyon an total, par an.

Me anmenmtan, nou bezwen konsyan lenpak en ogmantasyon saler, sirtou an term son soutenabilite lon term lo bidze pei e lo lenflasyon.

Msye Spiker, gouvènmman i anploy li apepre 11 mil travayer dan sekter piblik, ki reprezant anviron 20% total endividi dan marse lanplwa. Dan bidze 2025, en sonm SR 3.7 bilyon pe ganny propoze pour reminerasyon ek saler dan servis piblik - en ogmantasyon SR 309 milyon ouswa 9% letan ou konpar avek bidze revize an 2024. Sa i reprezant 11.3% GDP konpare avek 11% dan bidze revize an 2024.

Msye Spiker, pour 2025, gouvènmman pe propoz en ogmantasyon 7% lo saler de baz par mwan, pour tou travayer sekter piblik ki pe ganny par anba SR21,368. Tou

travayer ki pe ganny plis ki SR21,368, zot pou resevwar en ogmantasyon SR1,500. Sa ogmantasyon i garanti en minimonm SR500 pour tou travayer ki travay a plen tan. Sa ogmantasyon 7% i osi aplik pour bann 'home carer'. Msye Spiker, sa limit SR 1,500 i nesese pou asire ki sa ogmantasyon saler i reste soutenab e ekitab. I enportan note ki sa ogmantasyon saler pa aplikab pour bann lapwentman konstitisyonel.

Msye Spiker mon ava donn 3 legzanp pou ilistre sa logmantasyon;

- En 'House Keeper' son saler de baz ki pa enkli son alawens pou sorti SR 7,343 pou vinn SR 7,857
- En Staff Nurse e en ansennyan, son saler de baz ki pa enkli son alawens pou sorti SR 13,204 pou vin SR 14,128
- En graduate ki konmans lo en saler de baz SR 16,546 pou aprezan ganny SR 17,704. Sa pa enkli okenn alawens.

Msye Spiker, sa ogmantasyon dan saler servis piblik pou pran lefe le 1 Avril 2025 e pe kout SR 115 milyon, ki reprezant 0.3% GDP. Sa ogmantasyon pou annan en lenpak anyel SR 153 milyon.

I bon note osi, sa ogmantasyon i dezyenm dan lespas zis 2an ki nou gouvernman pe donn travayer sekter piblik. Nou devret osi note ki i premye fwa ki Gouvernman in donn en logmantasyon saler 2 fwa dan en en pti dele letan. Mon lapel avek zot; se avek sa lenvestisman ki gouvernman pe fer anver zot, pou silvouple perform a en oter ki pou ed lekonomi agrandi plis e donn en servis o nivo ki piblik pe ekspekte.

Msye Spiker, an 2025, gouvernman pou komans lenplimantasyon son Sistenm Zesyon Resours Imen (HRMS), ki pou kout US\$ 1.7 milyon. Sa sistenm pou elimin bann louvraz administrativ mannyel, redwir letan prosis, redwir litalizasyon papye, e amelyor kapasite pran desizyon. Sa transformasyon pou asir meyer planifikasyon lafors travayer, amelyor satisfaksyon nou bann staff, e permet nou zer resours avek plis presizyon.

### **10.1 Ogmantasyon dan saler minimonm**

Msye Spiker, avek devlopman dan lekonomi e prenankont ki dernyen fwa ki in anann en revizyon dan saler minimonm ti an Zanvye 2020, gouvernman in war li nesese pou revwar saler minimonm.

Baze lo bon Pratik, en revizyon tou le 5 an i neser pou fer sir ki saler i ganny aziste pou reflekte lenflasyon. Gouvernman i salye bann biznes dan sekter prive ki lo en baz regilye i ogmant saler zot travayer baze lo performans zot biznes. Gouvernman i rekonmann bann pratik parey, me nou osi konsyan ki annan biznes ki baz reminerasyon zot travayer pirman lo saler minimonm ki ganny rekonmande dan lalwa lanplwa.

Msye Spiker, en legzersis in ganny fer pou revwar saler minimonm, e nou pe propoz en ogmantasyon 7%, konm swivan;

- Sorti SR 38.27 pour vinn SR 40.95 par erdtan pour travayer ki ganny anploye. Sa i vedir en travay ki baze lo 40 erdtan par semenn, saler minimonm pou ogmante sorti SR 6,633.47 pour vinn SR 7,098 par mwan.
- To lapey pou bann travayer ki pa anploye a plen tan (casual) pou ogmante sorti SR 44.10 pour vinn SR 47.19 par erdtan.

Msye Spiker, Departman lanplwa ansanm avek bann partner kle pou konmans fer konsiltasyon lo revizyon saler minimonm dan bann prosenn mwan e nou lentansyon se ki okenn ogmantasyon ava pran lefe ver Avril 2025.

## **11. Sekter Lanplwa**

Msye Spiker, avek propozisyon pou ogmant saler travayer, nou ekspekte ki sa linisyativ i ava ankouraz plis Seselwa pou antre dan en lanplwa formel.

To mank lanplwa nasyonal pour lannen 2023 ti 3% konpare avek 3.9% an 2022. Nou'n osi obzerv en rediksyon sorti 13.7% pour lannen 2022 pour vin 9.5% lannen 2023 dan to mank lanplwa parmi zenn. Sa i demontre progre ki'n ganny fer e gouvernman pou kontinyen met anplas bann polisi ek mezir pou met plis dimoun dan en lanplwa.

Msye Spiker, en sitiasyon ki preokip gouvernman bokou dan marse lanplwa i sa kantite dimoun, sirtou zonn, ki dan lanplwa enformel. Nou dernyen estimasyon se ki i annan apepre 8,000 endividi ki dan sa sekter. Sa i vedir zot pa pe fer kontribisyon pansyon e zot osi pa pe benefisyve avek serten proteksyon dan lalwa lanplwa.

Departman Lanplwa avek lasistans lorganizasyon enternasyonal pour travay in fer en letid lo lanplwa enformel dan Sesel e bann desizyon polisi pou ganny konsidere avek diferan partener pour adres rekonmandasyon sa resers. Nou rekonnet ki

plizyer endividi ki dan en lanplwa enformel i osi en viktim drog ou lalkol, savedir bann lentervansyon pou osi enkli kolaborasyon avek lezot Minister.

En popilasyon byen edike konsernan loportinite lanplwa, ava ede redwir presyon lo Departman Lanplwa, an sa ki konsern bann diferan program ki zot pe ofer an se moman, swa pou plas dimoun dan lanplwa oubyen pou donn zot en ‘skill’ travay. Depi 2021 a 2023, Departman Lanplwa in plas an mwayenn, apepre 1,600 endividi dan en lanplwa par an.

Msye Spiker, sa departman pe administre 3 program spesyal ki ede met dimoun dan en lanplwa. Sa 3 program i: Devlopman Skil, Mon Premye Louvraz, e ‘Re-skilling’. Pour lannen 2025, alokasyon anba sa bann skim i konm swivan; en sonm SR 5 milyon anba Program ‘Mon premye Louvraz. Gouvernman pe met SR 1 milyon adisyonnèl anba program ‘Devlopman Skill’ e ‘re-skilling’ ki pou kouvertiket bis gratwit pour bann partisipan. An total - SR 5.6 milyon pe ganny rekonmande anba program ‘devlopman skill’ e ‘re-skilling’.

An mwayenn, plis ki 100 dimoun ki ti pe rod en lanplwa ti anrezistre lo program re-skilling depi lannen 2021 ziska 2023. Osi, an mwayenn par lannen, plis ki 400 etidyan ki ti konplet zot letid pos segonder ti ganny plase dan en lanplwa atraver program “Mon Premye Louvraz” e; plis ki 300 zenn ti ganny plase lo program ‘Devlopman Skill’ an mwayenn par lannen.

Departman Lanplwa anba son program lokalizasyon, pandan 2021 ziska 2023 in reisir ranplas 81 etranze ki ti dan bann pozisyon lo nivo zestyon e sipervizyon sirtou dan lendistri tourizm par nou Seselwa. Msye Spiker, sa i asire ki Seselwa i ganny loportinite pou avanse dan zot karyer profesyonnel.

Msye Spiker, avek tou sa evolisyon e devlopman ki pe annan dan marse lanplwa dan nou pei, i enportan ki nou annan en lanplwa ki modern e ki reflekte larealite marse lanplwa e lekonomi ozordi. Travay pou reviz sa lanplwa i ase avanse e sa proze de lwa pou vinn devan Lasanble Nasyonal boner lannen prosenn.

Msye Spiker, plan nasyonal pour resours imen i espekte ganny finalize ver lafen 2024. Sa plan pou met devan bann skills e lanplwa ki an demann ozordi e pour sa prosen 5 an. I pou diriz bann lenstitisyon ledikasyonel e lorganizasyon lo domenn ki an demann lo marse lanplwa, pou asire ki nou pep i ganny formen dapre bezwen pei.

## 12. Sektor Ledikasyon

Msye Spiker, lenvestisman dan sektor ledikasyon i reste en priyorite pour nou gouvènmàn. Sa sektor i anfet fondasyon e primordyal dan sa transformasyon ki nou pei pe pas atraver. Nou bann zanfan i devret konpran ki nou pe fer en kantite lenvestisman finansyel dan zot ledikasyon, me alafen dizour, i depan lo zot pou sezi sa loportinite e pran zot ledikasyon o serye pour zot kapab ganny en bon lavenir demen. Zot bezwen realize ki sa ‘bout papye’ ki zot gannyen enfwà zot termin zot letid ki determinen ki kalite travay ek saler zot pou gannyen.

Msye Spiker, nou pou bezwen al dan en reform transformativ dan nou sistenm ledikasyon. Nou sistenm ledikasyon pa pou kapab reste kot i reflekte bann realite 20 an, 30 an pase. Lemonn in evolye e Sesel i bezwen met li pare pou sa nouvo lemond ki nou pe viv ladan.

Nou annan en responsabilite pou nou prepar nou zanfan pour sa lasosyete ozordi e osi pou sa nouvo lemond travay. Nou bezwen sorti dan en sistenm ki santre lo zis formasyon akademik me enn ki osi enkli devlopman lezot 'skills" ki zot pou bezwen dan zot lavi. An dot mo nou bezwen ede fer zot vin pli rezilyan e osi annan plis bagaz pou bann nouvo louvraz ki nou lekonomi pe e pou prodwi.

Sa i anmenn mwan lo en size ki monn koz bokou lo la. Sa se asire ki nou lekonomi i prodwi bann louvraz ki pey en saler pli O. Sa i deza pe arive, me, nou war ki nou ganny bokou problem pou ranplir sa bann pozisyon. Ki mannyer nou fer pour nou pep ganny en louvraz ki pey en pli O saler e sa i ava ed zot viv en lavi pli konfortab? Annou nou tou travay ansanm pou kontinyen ed nou lekonomi prodwir bann louvraz ek loportinite ki anmenn plis rannman. Annou devlop en sistenm ledikasyon ki donn nou bann zanfan loportinite pou ganny konpetans pou prepar zot pou kapab pran sa bann pozisyon.

Pour lannen 2025, sa sektor pe ganny en bidze SR 1.4 bilyon. Sa sonm i reprezant 4.3% nou GDP. Nou vwar en alokasyon SR 614.4 milyon pe ganny propoze dan bidze pour saler e reminerasyon, ki reprezant 44% depans total anba sa sektor. Pli gro sonm pour sa sektor, i anba ‘byen ek servis’ pour en sonm SR 667.5 milyon, ki reprezant 47% depans total anba sa sektor, e SR 126.9 milyon pe al anver depans dan bann proze kapital.

Msye Spiker, pou asire ki nou zanfan i ganny en pli bon konmansman depi ler zot ankor pli zenn, an 2025 gouvènmàn in met en sonm SR 27.96 milyon pour ‘Child

Care Scheme’. Lenstiti pour Devlopman Pti Lanfans pe osi enplimant en nouvo sistenm nimerik pour sa lasistans finansyel, anlinny avek azanda lekonomi nimerik. Ziska Oktob 2024, i annan 2,483 zanfan ki’n anrezistre lo sa sistenm ki pe benefisyé avek sa lasistans.

En sonm SR 1.6 milyon in osi bidzete an 2025, pour ‘Fon Pti Lanfans’. Se bann ‘child care managers’ e ‘childminders’ ki ganny asiste anba sa fon. Zot kapab fer laplikasyon pou resevwar lekipman e resours edikasyonnel pour ki zot an konformite avek standar ki IECD ek son bann partener in etabli.

Msye Spiker, parey zot konnen gouvènmman i investir dan sekter ledikasyon lo tou nivo lekol. Depi sa ki dan ‘child care’ ziska lo nivo liniversite. An 2025, en sonm SR 198.4 milyon pe ganny bidzete dan fon letid. Sa i kouven pour endividi ki deza dan en lanplwa e osi etidyan kin termin zot letid dan bann sant profesyonnel.

Apard, ki program labours gouvènmman, en alokasyon SR 8 milyon pe bidzete pour lannen 2025 pour skim ‘loan edikasyonnel’ avek labank komersyal. Sa skim i permet etidyan annan sa opsyon pran en loan pou investir dan zot prop ledikasyon. Depi ki sa skim ti lanse an 2023 nou annan anviron 25 etidyan kin deza benefisyé, pour en lavalèr loan SR 11.6 milyon.

I byen osi note ki depi sa lannen, gouvènmman pe ofer 5 ‘fully funded scholarships’ tou le lannen dan domenn Lenformasyon, Kominikasyon ek Teknolozi (ICT). Sa i touzour anlinny avek nou stratezi transformasyon nimerik. Dan sa domenn i annan en gran demann me nou napa ase Seselwa kalifye.

Msye Spiker, gouvènmman i reste angaze pou anmenn teknolozi dan ledikasyon, sa pou ede fasilite lavi bann ansennyan e osi i pou pli adaptif pou bezwen bann zenn ki ozordi pe viv dan en lemonn kot zot pe ganny ekspoze avek diferan form teknolozi. En alokasyon SR 29.2 milyon in bidzete pou asire ki nou kree sa lanvironnman ki pou fasilite laprantisaz e fer sir ki nou bann zenn i epanouir. I pour sa rezon ki depi sa lannen, zanfan depi P5 an montan pe ganny akse avek skim ‘laptop’. An 2025 provizyon bidzeter pour sa skim i SR 6 milyon. Anba sa skim gouvènmman i fer en kontribisyon SR 3,000 anver pri laptop pour tou zanfan.

Gouvènmman dan son plan transformasyon nimerik in angaz li pou ekip lekol avek resours apropriye pou fasilite son lenplimantasyon. An 2024, gouvènmman in prokir 330 ‘desktop’ pour lasal konpiter e 314 ‘laptop’ pour ansennyan lo nivo administrativ e bann ki ansarz bann program. An 2025 gouvènmman pou prokir

‘laptop’ pour tou lezot ansennyan kalifye. Aparti 2026 sa program pou enkli asistan ansennyan. Msye Spiker, fodre note ki avan lentrodiksyon sa program sa lannen, ansennyan ti bezwen pran en ‘loan’ avek Minister Ledikasyon pou aste zot laptop. Depi sa lannen, zot pe ganny donner zot zouti travay.

Msye Spiker, gouvènmman in ekout bann defi ki bann paran ki annan bann zanfan ki ganny afekte avek Otizm i fer fas avek. I kler ki napa ase ki’n ganny fer pou asiste sa bann paran e ed sa bann zanfan, sirtou pou asire ki nou annan en sistenn ledikasyon pli enklisiv. Pandan sa lannen gouvènmman in antre dan en konversasyon avek Lasosyasyon Otizm pou konpran pli byen bann defi e kwa ki nou kapab fer koman en gouvènmman pou ede. La mon ti a kontan eksprim mon apresyasyon avek Lasosyasyon Otizm ki vreman pro aktiv e determinen dan zot lalit pou ganny plis lasistans pour zot koz.

Alor avek sa bi antet, aparti Zanvye 2025, gouvènmman pe met resours apropiye pou enkonpor sant ‘Otizm’ anba lankadremman Minister ledikasyon. En sonm SR 4.1 milyon in ganny mete dan bidze pou kouver kou loperasyon sa sant. Sa i enkli rekritman profesyonel ki travay avek sa bann zanfan, e osi pou donn formasyon bann ansennyan ek paran pou pli byen pran swen avek sa bann zanfan. Mon donn mon lasirans avek bann paran ki sa i selman en konmansman, dan zefor gouvènmman pou kontinyelman ed bann zanfan otizm. Mon fer en lapel avek bann lezot lasosyasyon ki pe fer bann louvraz nob pou apros gouvènmman e konmans en konversasyon e nou ava regarde ki mannyer nou travay pli pros ek kanmarad pou ed nou pep.

Msye Spiker, anba proze kapital dan sekter ledikasyon, en sonm SR 126.9 milyon pe ganny propoze dan bidze 2025. Bann proze renovasyon enpe pli mazer i konm swivan:

- Renovasyon lo lenfrastruktir ‘Headquarters’ pour Minister Ledikasyon - SR 9.7 milyon
- Renovasyon lekòl Primer La Rosiere - SR 2 milyon
- Renovasyon lekòl Bel Eau - SR 2 milyon
- Renovasyon lekòl Bel Ombre - SR 2 milyon
- Renovasyon lekòl Glacis - SR 2.5 milyon
- Renovasyon lekòl Primer Perseverance- SR 3 milyon
- Renovasyon lekòl Belonie - SR 2 milyon
- Renovasyon lekòl La Retraite SR - 1.5 milyon
- Renovasyon lekòl Segonder Anse Boileau - SR 4 milyon



- Renovasyon lekol Segonder Mont Fleuri - SR 1.5 milyon
- Renovasyon lekol Segonder Anse Royale - SR 2.5 milyon
- Renovasyon lekol Segonder Praslin - SR 3 milyon
- Renovasyon Youth Hostel - SR 2 milyon
- Renovasyon Lenstiti Teknolozi - SR 3 milyon
- Renovasyon mazer Lenstiti Ansennyen - SR 4.5 milyon

An term bann nouvo proze Konstriksyon sa i konm swivan;

- Konstriksyon nouvo blok lekol Primer La Rosiere - SR 15 milyon
- Konstriksyon nouvo laplenn lekol Glacis - SR 3 milyon
- Konstriksyon lekol La Digue - SR 47.6 milyon
- Konstriksyon miray o tour lenstiti SIDOL - SR 3 milyon
- Konstriksyon miray o tour lekol A Level - SR 2.5 milyon
- Demolisyon e konstriksyon nouvo blok laklas lekol Segonder Praslin - SR 4.5 milyon
- Konstriksyon 'Mini Sewage Treatment Plant (STP)' pour lekol Primer e segonder Anse Boileau - SR 4.2 milyon
- Konstriksyon en laklas pour zanfan avek bezwen spesyal lekol Beau Vallon - SR 600 mil

Msye Spiker, parey nou vwar gouvènmman pe kontinyen investir dan sekter ledikasyon nou bann zanfan. Me parey monn dir pli boner, i pa depan lo zis nou, me la kominote, sirtou paran ek zanfan pou zot sezi bann loportinite edikasyonel ki a zot dispozisyon.

### **13.Sekter Lasante**

Msye Spiker, byennet nou pep an sa ki konsern lasante i reste enn bann priyorite pli enportan pour gouvènmman. Pour lannen 2025, en sonm SR 1.52 bilyon pour sekter Lasante in ganny propoze. Sa i en ogmantasyon 9% konpare ek 2024 e 15% konpare avek 2020 avan sa ladministrasyon ti vinn opouvwar. Depans anba byen ek servis i reprezant 45% bidze total sekter Lasante. Sa i en reprezant SR 679.9 milyon

Bann depans pour byen ek servis i enkli:

- Depans lo provizyon medikal - SR 75.3 milyon
- Depans lo provizyon vaksen - SR 10.2 milyon
- Depans lo provizyon laboratwar - SR 36.6 milyon

- Depans lo tretman dyaliz - SR 76.8 milyon
- Depans lo lezot provizyon medikal ek laboratwar - SR 70.4 milyon
- Tretman spesyalize aletranze - SR 50 milyon
- Formasyon profesyonnel lasante - SR 9.3 milyon

I enportan osi note ki en sonm SR 696.3 milyon ki reprezant 45.7% bidze total lasante i pou peyman saler bann profesyonel lasante. Sa sonm i osi reprezant 18.7 % total bidze saler sekter piblik.

Msye Spiker, lenvestisman dan nou fasilite lasante i reste en priyorite pour gouvènmman. Dan sa bidze 2025, en alokasyon SR 146.6 milyon pe ganny prozekte dan sekter lasante, an term proze kapital. Sa i reprezant 7.9% proze kapital gouvènmman. I enportan pou note ki bokou nou bann fasilite lasante in avarye e sa i fer li enportan pou kontinyen nou program renovasyon lo sa bann fasilite. Pandan sa bann lannen ki'n pase nou ladministrasyon in fer lenvestisman pour en sonm SR 136 milyon lo sa bann fasilite swivan ;

- Renovasyon lo ward Zonm ek Madanm
- Renovasyon kontinyel lo Lopital Sesel
- Travay pou kouverti labotwar pou vin ICU
- Fasilite stokaz LPG kot lopital Mahe ek Praslin
- Renovasyon lo sant sterilizasyon CSSD
- Travay lo complex North East Point
- Konstriksyon Lopital St Mary's La Digue
- Lenstalasyon 'lifts' Lopital Sesel e
- Akizisyon 2 'stand by generators'

Pour 2025, travay i kontinyen e nou pe propoz en bidze SR 34.5 milyon pour renovasyon bann lezot fasilite lasante. Sa i konm swivan ;

- Travay renovasyon lo Lopital Sesel - SR 15 milyon
- Renovasyon Sant Lasante Anse Boileau - SR 2.6 milyon
- Prokirman e enstalasyon 'lift' dan lopital Anse Royale - SR 2 milyon
- Kontinyasyon proze pou azout nouvo fasilite dan batiman NIHSS - SR 2.5 milyon
- Provizyon pou renovasyon lopital - SR 4 milyon e renovasyon lo lezot sant lasante - SR 3 milyon
- Renovasyon bann lezot lenfrastruktir lasante - SR 5.4 milyon

Anplis ki renovasyon, investisman dan bann nouvo fasilite lasante i osi enportan. Travay lo klinik Baie Lazare in fini konmanse e sa pou kout SR 8.7 milyon. E de lezot proze prensipal pour lannen 2025 i ;

- Konstriksyon en Stor Medikal - SR 16.98 milyon
- Konstriksyon en nouvo Sant Lasante 'Ile Soleil', Anse Aux Pins- SR 9 milyon

Pli gro proze ki nou ekspekte konmanse an 2025 i en nouvo lopital. Sa lannen nou lopital Sesel i ganny li 100 an. I kler ki sa fasilite nepli soutenab ozordi e pour le fitir. I enportan pour nou investir dan en nouvo lopital modern ki pou zwenn laspirasyon e bezwen nou pep pour sa prosen 100 an. Sa lenvestisman i pa zis konstriksyon en nouvo batiman me investir dan en fitir pour tou Seselwa ganny akse avek servis medikal pli spesyalize. Sa lenvestisman i reprezant en vizyon lon term ki gouvernman i annan pour en sistenm lasante pli soutenab, rezilyan e kapab donn en servis pli o nivo pour nou popilasyon. Gouvernman pe finaliz en evalyasyon konpreansif lo proze nouvo lopital ki pran ankout tou lezot fasilite lasante ki egziste ozordi. Dan bidze pour sa prosen 3 an en sonm aprepre SR661.2 milyon in ganny propoze. En alokasyon SR 87 milyon in ganny mete dan bidze 2025 pou demar sa proze.

Msye Spiker mwan osi anvi remersi sa komite ki pe travay vreman dir pou rod finansman pour konstriksyon nouvo lopital, dan sa menm lespri kot bokou dimoun ti kontribye pour konstriksyon lopital Sesel, en santener pase. Nou tou annou mazin ki en zour nou, e nou fitir zenerasyon pou servi sa fasilite. Dan sa lespri, mon fer en lapel avek tou Seselwa pou kontinyen met zefor ansanm pou fer sa proze vin en realite.

En lot proze ki nou pe al war son benefis se sa lenvestisman dan en Sistenm Lenformasyon Entegre pour lasante ki pandan sa dernyen 5an in kout bidze SR 53.1 milyon. Sa nouvo sistenm lenformasyon pe ganny enplimante kot Lopital Sesel e tou lezot fasilite lasante ki ava ede ki okenn dokter ouswa ners ki pe donn en servis en pasyan a okenn moman, a kapab ganny akse avek lenformasyon medikal pli vit lo sa pasyan. Alors bann profesyonnel dan sekter lasante ava kapab donn en dyagnostik e en tretman pli kordinen lo sa pasyan avek bi pou amelyor kalite swen lasante e lefikasite dan servis lasante.

Sa sistenm pou osi :

- Enplimant sistenm apwentman dan klinik ki a ede pou minimiz letan ki pasyan i espere pou ganny servis

- Fer li pli fasil pou kolekte lenformasyon, ki pou ede pou annan polisi pli targete dan domenn lasante
- Fasilit ladministrasyon bann ward pou fer sir ki tou lekipman nesese i ganny mete depandan lo bezwen pasyan

#### **14.Devlopman Sport e Lazen**

Msye Spiker, en nasyon ki aktiv i enn ki prodiktiv e an bonn sante, ki ede pou redwir presyon lo nou sistenm lasante. I pour sa rezon ki gouvènmman pe investir bokou dan devlopman sportiv. Avek en lemond ki anmenn bokou defi pour nou popilasyon dan laspe lasante mantal e fizik, sport i reste sa eleman kritik pou fer nou sirmont sa bann lobstak. Lenvestisman dan lenfrastriktir sportif i ava ed nou zenn epanouir, pa zis lokalman me osi lo nivo enternasyonal.

An 2022, mon ti vizit bann fasilite sportiv ansanm avek minis responsab pour sport, kot mon ti deklare ki nou bann lenfrastriktir sportif in ganny tro negligè e pann ganny byen mentenir.

Pandan lannen 2024, gouvènmman in investir SR 42.8 milyon lo reparasyon diferan lenfrastriktir sportif e osi SR19.4 milyon an 2023. Bann pli gran lenvestisman i konm swivan:

- Travay renovasyon Stad Linite ki enkli nouvo sirfas pour atletik- SR 5.5 milyon. Travay osi pe kontinyen pou renovasyon lo ‘changing room’ pour atlet avek refri.
- Kontinyasyon travay renovasyon ‘Palais des Sports’- SR 7 milyon
- Renovasyon lo 5 kort tennis in konplete ki enkli en nouvo sistenm konpreansif pour lalimyer. Sa i ava ed bann atlet annan plis vizibilite letan pe fer aktivite apre ler
- Travay osi pou komanse sa lannen lo renovasyon twatir ‘ex-school meal center’
- Renovasyon pou osi konmanse lo fasilite ‘dojo’
- Gouvènmman pe osi fer prokirman lekipman e sirfas pour de kort dan distrik.
- En ‘kicking gym’ in ganny konstrir Roche Caiman Sports Complex ki sipòrt bann atlet ‘martial arts’.

Sa travay renovasyon entansiv pou kontinyen pandan lannen 2025 avek bi asire ki nou fasilite sport i a en nivo, pou ankouraz plis aktivite sportif enternasyonal fer isi Sesel. En prozeksyon SR 88.1 milyon pe ganny prozekte e bann pli gran alokasyon i konm swivan;

- Renovasyon ‘Sports Complex’ Anse Royale - SR 5.6 milyon
- Bann lezot renovasyon Stad Linite ki enkli en nouvo tinel pour atlet e osi renovasyon ‘south stands’ ki pou donn en nouvo konfor spektater - SR 7.7 milyon
- Konstriksyon en ‘Multi-Purpose Indoor Court’ Anse Royale- SR 42.4 milyon. Sa proze pe al lo prosedir tender ver lafen Novanm 2024
- Renovasyon ‘Sport Complex’ La Digue - SR 1.6 milyon
- Renovasyon fasilite lenfrastruktir sports Mont Fleuri ki enkli sistenm drenaz- SR 1.5 milyon
- Renovasyon Stad Amitie Praslin- SR 2 milyon
- Bann lezot renovasyon ‘Palais des Sports’- SR 1.9 milyon
- Travay renovasyon kot basen naze ki enkli ‘changing room’ pour atlet - SR 1 milyon.

Sa i enkli SR 20 milyon pe ganny bidzete an 2025 pou siport lezot travay renovasyon lo fasilite sportif. Sa i enkli;

- Renovasyon pour anferm fasilite kort ‘multipurpose’ Mont Buxton e Port Glaud.
- Renovasyon ‘changing room’ lo fasilite sport Point Larue e Baie Lazare.
- Konstriksyon ‘outdoor gym’ dan distrik Grand Anse Mahe, Anse Boileau, La Digue avek Takamaka, pour en total SR 3.4 milyon. Mon swete zabitan sa bann distrik a pran sa loportinite pour zot angaz zot plis dan aktivite fizik e sa i ava en benefis lon term pour nou sosyete.

Mnye Spiker, an 2025, Sesel pou akeyir de aktivite sportiv enternasyonal. Premye ki pou fer an Me, i ‘FIFA Beach Soccer World Cup’ e dezyenm an Zilyet – CJSOI. Gouvernman pe met en sonm SR 40.6 milyon dan bidze anba byen ek servis pour lorganizasyon e partisipasyon dan ‘CJSOI’ e SR 3 milyon dan ‘FIFA Beach Soccer World Cup’.

En sonm SR 3.2 milyon in bidzete pour lasistans pour bann federasyon. En sonm SR 745,000 in osi ganny mete pour lasistans bann lekip letan zot vwayaze lo bann zil pou fer konpetisyon. En sonm SR 1.58 milyon pe ganny bidzete pour devlopman zenn dan sports e SR 723,740 pou idantifye talan. En sonm SR 1.71 milyon osi in ganny bidzete pour alawenns pour lantrener.

Nou pe osi met en sonm SR 3.1 milyon dan bidze 2025 pour devlopman sport lo en baz profesyonnel. An 2025, i annan en sonm SR 5.75 milyon pour preparasyon

bann atlet pour zwe Olenpik, Zwe Lafrik, Zwe Losean Endyen, e Zwe ‘Commonwealth’ ki pou fer dan bann lannen ki pe vini.

Gouvernman in osi finaliz diskisyon avek lasosyasyon ‘motor racing’ pour sa morso semen ‘Ile Du Port’ ki anba konstriksyon pou ganny servi pou organiz zot aktivite pour zot manm. Sa lasosyasyon pou bezwen investir dan mezir sekirite avan ki Gouvernman i donn zot laprouvasyon final.

Gouvernman pou kontinyen ‘empower’ bann zenn atraver diferan aktivite. Konsey Nasyonal pour Zenn in ganny alokasyon en bidze total SR 26.6 milyon pou elarzi aktivite e siport bann linisyativ dirize par bann zenn lo nivo distrik ek rezyon. Priyorite pou lo ogmant lakantite klib zenn ki angaze dan bann domenn enpe diferan parey ‘coding’, devlopman aplikasyon, ek inovasyon dan domenn nimerik, pour devlop bann kapasite enportan pour transformasyon nou lekonomi. Anplis, i pou annan investisman dan nouvo programm parey ‘boot camps’ ek formasyon lantreprenarya, vize lo bann zenn ki konn teknolozi e pour ankouraz inovasyon lo baz ‘grassroots’. Promosyon lar, ek linisyativ servis kominoter bann Klib Lentere pou asire ki annan en gran varyete loportinite pour tou zenn dan pei. Gouvernman pe osi kolabor plis avek bann partner rezyonal pou ofer loportinite pou ekspoz nou bann zenn Seselwa lo marse Lafrik, Lerop ek Lanmerik. Sa pou ouver laport pou eksperyans enternasyonal ek loportinite, ki pou anrisir zot devlopman personnel ek profesyonnel.

## **15. Bann Proze e Programm dan Lakominote**

Msye Spiker, parey zot in konstata, gouvernman pe fer en kantite lenvestisman dan bann fasilite sportif lo nivo distrik, avek bi ankouraz nou popilasyon pou vin pli aktiv e partisip plis dan zot kominote. Sa lenvestisman i form parti en pli gran stratezi ki gouvernman pe fer dan distrik pou benefisye plis nou zabitan. Amelyor bann fasilite e aktivite ki anann pou fer dan kominote i form part en plan Gouvernman pou lager osi kont bann fleo parey labi sibstans e krim.

An 2025, Minister responsab pou Zafer Kominoter e Gouvernman Lokal, an partenarya avek son bann partner, pou develop en polisi nasyonal lo byennet e epanouisman kominoter, avek bi:

- Asire ki tou servis gouvernman i ganny kordinen e tous tou kous nou popilasyon;

- Asire ki devlopman lenfrastruktir i bouz ansanm avek devlopman e epanouisman imen e
- Asire ki fleo sosyal i redwir e ki bann bon valer kominoter, enkli bann valer moral e spirityel i ganny ranforsi.

Msye Spiker, sa transformasyon ki Sesel pe pas atraver depi 2020, i pa zis pe target nou lekonomi, me osi nou kominote. In annan bokou lanfaz kin mete lo programm kominoter pou ede anmenn dimoun ansanm dan diferan kalite programm apre ler - ki swa dan lar, ledikasyon, kiltir, spirityel e lezot. Bann kan vakans O nivo in ganny organize dan diferan distrik, sa se pou fer sir ki bann zanfan i annan en keksoz pou fer dan vakans.

Gouvernman pe travay lo enstalasyon sistenm CCTV kamera dan serten distrik pou amelyor sistenm sekirite dan biro ek fasilite distrik.

Msye Spiker, depi lannen 2021 ziska lannen 2023, gouvernman in konplet 356 proze dan distrik pour a lavaler SR 58.1 milyon. An 2024, nou ekspekte pou konplet 184 proze pour en sonm SR 35 milyon. Pour lannen 2025, gouvernman pe fer en alokasyon SR 26 milyon pour bann pti proze dan distrik. En sonm SR 15 milyon in osi ganny mete pour bann pti semen segonder dan distrik ki i ava ed deplasman nou zabitan. Sa sonm i en ogmantasyon konpare avek en alokasyon SR 10 milyon an 2024.

Gouvernman i annan li en total 15 sant Day Care, e 10 parmi in pas anba renovasyon mazer pandan lannen 2023 a 2024. An 2021, 5 nouvo Day care ti ganny konstrir e ti ganny remet avek operater atraver prosedir ‘tender’. Sa i Grand Anse Praslin, Baie St Anne Praslin, Takamaka, Anse Aux Pins, e Glacis. Day Care Mont Fleuri i dan staz reparasyon e nouvo Day Care Les Mamelles i dan prosedir ‘tender’. Sa lannen, gouvernman i ekspekte depans SR 2.8 milyon e nou pou ogmant sa sonm pou vin SR 4.4 milyon an 2025 pour konstriksyon e renovasyon ‘day care’.

Laplipar bann biro oubyen sant kominoter i date depi bann lannen katrevendis e zot pa dan en leta konvenab. Depi 2021 ziska 2024, travay renovasyon in ganny fer lo 14 parmi sa 26 lofis, sa i enkli biro ladministrasyon distrik e sant sosyal Grand Anse e Baie Ste Anne Praslin. Travay reparasyon mazer in ganny fer lo 12 Sant kominoter.

En bidze total SR 15.8 milyon pe ganny bidzete an 2025 pou konplet biro ladministrasyon Distrik Bel Ombre; Sant Kominoter ek biro ladministrasyon distrik Cascade, e Perseverance. En alokasyon SR 1.5 milyon pe ganny bidzete pour renovasyon twatir sant kominoter Anse Royale e SR 1 milyon pour renovasyon sant kominoter Beau Vallon.

Msye Spiker, volontarya i en aksyon ki bezwen ganny plis ankouraze dan lakominote ki ava enkilke bann bon valer dan nou sosyete. I annan bokou zabitan ki pe donn sa bann servis volonter, espesyalman dan bann letan dirzans. Enn parmi sa bann groupman i Brigard Dirzans ki tonm anba responsabilite Administrasyon Distrik. Nou salye zefor sa bann endividi e pour sa rezon ki gouvènmman pe ogmant sa ‘incentive’ sorti SR 1,500 par an, pou vin SR 3,000. Sa pou pran lefe an 2025.

## **16. Sekter Sosyal**

Msye Spiker, menm avek tou sa lenvestisman pou ed nou popilasyon epanouir e debourye, malerezman i annan ki feb e war zot tonm dan diferan kalite fleo sosyal. Nou tou nou ti a swete ki en zour, nou viv dan en Sesel kot tou fleo sosyal in ganny mete anba kontrol oubyen konpletman eliminen. Me sa i reste touzour en aspirasyon. Ozordi, nou pe bezwen kontinyen donn sipor nou bann frer ek ser kin tonbe, avek lespwar ki en zour zot a redebout e vin pli rezilyan pour zot kontribye ver zot fanmiy, lakour ek pei.

Msye Spiker, avek sipor Labank Mondyal, en analiz e resers detaye e aprofondi in ganny fer pou regard bann faktor risk dan nou bann zenn. Apre plizyer resers, ‘interview’, miting e konsiltasyon Labank Mondyal in prezant rezilta sa rapor. Msye Spiker, rezilta sa resers i enn ki konsernan e si konman en nasyon nou pa pran en pli gran responsabilite pou edik, ekip, ankandre e sipor nou bann zenn nou pa pou bouz devan.

Msye Spiker, gouvènmman avek tou bann partner kle pou bezwen travay ansanm pou nou adres bann defi devan nou, lentervansyon pou bezwen vinn a trwa nivo; premyerman; ki mannyer nou entegre servis sosyal dan lekol pli byen, dezyenman; ki mannyer la kominote pou ede e anmenm en soutyen atraver bann aktivite kiltirel, sportif, spirityel e menm edikasyonnel e trwazyenman; ki mannyer nou pou ekip nou zenn pour zot war lenportans annan en karyer e ki kalite loportinite nou pou met a zot laporte ase boner pou fasilite sa tranzisyon.



Msye Spiker, anatandan, nou pe bezwen fer fas avek larealite ozordi, kot i annan nou zenn ki'n tonbe. Gouvernman i reste angaze dan sa lalit kont sa bann fleo ki pe afekte nou sosyete. Ver lafen sa lafen nou ekspekte war nouvo proze "Youth Hope Centre" konmanse. Sa proze i ekspekte kout en total SR 41.7 milyon. En alokasyon SR 30 milyon in ganny fer dan bidze 2025. Msye Spiker, sa sant i ava donn lespwar nou bann zenn. I pour en landrwa rezidansyel pour zanf an ki bezwen servis spesyalize an term zot konportman e ledikasyon alternativ. Sa proze pou annan 2 konponan, premye i pou en konponan Rezidansyel e dezyenm en konponan edikasyonel. Sa pou asire ki ler zenn i antre dan sa program i tous zot devlopman entegral ki pou ede reform zot karakter pou re-antre dan sosyete. Proze i ekspekte terminen ver katriyenm kar lannen prosenn, e en sonm SR 3.7 milyon in bidzete pou kouper son kou loperasyon lannen prosenn. Msye Spiker, sa sant pou kout Gouvernman SR 9.2 milyon par an pou zer li.

Msye Spiker, letan ki gouvernman pe depans plizyer milyon rounpi pou konbat kont trafik drog, i malere ki en group zot pe anrisir zot pos avek plizyer milyon rounpi sal ki tase avek soufrans tou viktim drog ansanm ek zot fanmir.

Depi ki nou'n vin o pouvwar, lalit kont drog in reste enn nou priyorite. Depi Zanvye 2021 ziska Out 2024, en total 1.2 milyon gram drog in ganny sezi. Sa i enkli eroin, kokainn, kanabis, 'ecstasy' e pandan sa de dernyen lannen drog parey "crystal meth e methamthetamine". Msye Spiker sa bann drog an total i annan en valer SR 439 milyon lo marse.

Zis mazinnen nou bann pov frer e ser ti pou depans SR 439 milyon rounpi lo sibstans ki detri zot lavi, lavi zot fanmir e la kominote an zeneral. Msye Spiker sa bann lasezisman in vinn an rezilta travay sanses ki departman lapolis pe fer. Pandan sa menm peryod zot in fer en total 2,118 larestasyon, dan ki 508 ka in ganny prosekite, e ziska Out 2024 - 221 ka in ganny anprizonnen.

Travay prevansyon e rehabilitasyon i bezwen mars kot a kot. Pou ede siport rehabilitasyon bann viktim avek adiksyon sa bann sipor neser pou met anplas;

- Renovasyon sant Anse Boudin – Praslin, pour bann pasyan avek adiksyon-SR 3 milyon.
- Finansman pou siport Dyosez Katolik avek en nouvo program rehabilitasyon anba parasol 'La ferme de L'espoir' pour ed bann zenn Seselwa ki'n ganny afekte avek adiksyon lalkol ek drog. Msye Spiker, sa proze pou baze dan distrik Port Glaud lo en propriyete ki pour Dyosez Katolik. Gouvernman an 2025 pou kontribye SR 4.1 milyon pou prensipalman kouper renovasyon lo

de batiman ki pou servi konman sa sant. Gouvernman pe osi kouven kou loperasyon pour 3 mwan an 2025, e an 2026 Gouvernman pou donn en sipor 390 mil rounpi ki pou kouven kou loperasyon sa sant pour 9 mwan.

- Gouvernman ansanm avek “ Care”, pou konmans en programm spesyal lo en baz pilot dan 6 lekòl primer, enn dan sak rezyon aparti Zanvye 2025. Sa programm pou target tou zanfàn dan P1 e i pou ale pour en peryod 3 an. Gouvernman pou sipòrt Care avek en bidze SR 1.8 milyon pour sa proze. Bi gouvernman se pou evantyelman enplimant sa programm dan tou lekòl. alors nou pe fer en lapel avek sekter prive pou vin devan e donn zot sipor. Msye Spiker, mon osi enplor bann paran pou ankouraz zot zanfàn pou partisip aktivman dan sa programm.

Msye Spiker, aparti Zanvye 2025, tou lekòl leta dan Sesel pou bezwen zwe en pli gran rol anver aktivite apre ler lekòl. Minister Ledikasyon ansanm avek bann lekòl e lezot partener tel ki SNYC, Lenstiti Kiltir, Gouvernman Lokal e Sosyete Sivil pou vinn pli aktiv e servi lanvironnman lekòl pou fer zot bann aktivite. Lanvironnman lekòl i enn parmi bann landrwa pli sekirize pour nou zanfàn, dan plas zanfàn apre lekòl al kot lakour e paran i ankòr pe travay ki ogmant zot risk al anver bann aktivite anti sosyal. Bann sipor swivan pou ganny met anplas aparti Zanvye 2025;

- SR 1.9 milyon anver bann klib lentere, ki tonm anba SNYC, pou developman bann proze e programm.
- SR 1.9 milyon pou sipòrt peyman pou bann animater dan distrik, programm pou tous tou group sosyete ki pou enkli bann zenn. Animater pou ganny peye SR 3,000 par mwan. Sa programm i administre par Minister Gouvernman Lokal.
- SR 1.7 milyon sipor adisyonnèl anba Lenstiti Kiltir pou sipor bann aktivite kiltirel e tradisyonnèl dan lekòl e dan kominote.

Msye Spiker, konstriksyon en “crisis centre” pou konmanse an 2025, en alokasyon SR 4.7 milyon in ganny mete dan bidze. Sa sant pou ekipe avek en “Call Center” ki pou fonksyonn 24 lo 24 avek en lekip ki pou travay avek bann ka ki ganny raporte apre 4er ler tou biro in fermen. Sa lekip pou osi donn servis ‘helpline’ e refer bann ka avek travayer sosyal pour lentervansyon. Msye Spiker, sa i montre langazman gouvernman pou reponn bezwen son pep a nenport keler e ki moman.

Msye Spiker, SR 4 milyon in ganny mete dan bidze pou kouven renovasyon en propriyete ki pou ofer servis pour viktim vyolans domestik.

Msye Spiker, pou nou bouz pli devan konman en nasyon, i pou depan lo en zefor kolektiv e kot sak endividi i pran son responsabilite. Gouvernman i met an plas diferan program e servis, me i reste responsabilite sak endividi pou servi tou loportinite ki a zot dispozisyon pou amelyor zot lavi personnel, zot fanmiy, zot lakominote e an retour Sesel ki prospere konman en nasyon.

## **17. Alokasyon pour bann program sosyal**

Dan bidze 2025, Gouvernman pou kontinyen onor son langazman pou finans bann program sosyal ki target dimoun pli vilnerab dan nou sosyete. Sa bann program i asire ki sa bann group e zot fanmir pa tonm dan laprovoyete, e kot gouvernman i aport en soutyen pou ed zot fer de bout zwenn. Bidze pour lannen 2025 pour sa bann program mazer i konm swivan :

Benefis administre par Lazans Proteksyon Sosyal :

- SR 61.8 milyon pour ‘Social Safety Net’
- SR 23.4 milyon pour benefis bann zanfan ki’n perdi swa en paran oubyen toulede paran,
- SR 7.7 milyon pour benefis ‘foster parents’
- SR 3.1 milyon pou benefis ‘multiple births’
- SR 6.6 milyon pour ‘sickness benefits’, e
- SR 1.3 milyon pour benefis maternite ek paternite

Nou ava rapel ki sa bann benefis ti ogmante an Zanvye 2024 e gouvernman ti azout enn nouvo, sa ti ‘Multiple Births’. Parmi serten pa tin ganny revize depi 2016.

Benefis administre par Minister ledikasyon ;

- SR 23.6 milyon pou kouver fre bis etidyan
- SR 3 milyon anver ‘Dedicated Fund’
- En sonm SR 35 milyon, pou kouver program ‘breakfast ek dezennen dan lekol

Benefis ki al anver bann program lakaz ;

- SR 10 milyon pour skim Reparasyon Lakour Vilnerab, sa i administre par Departman Lakaz;
- SR 10 milyon, special housing
- SR 5 milyon pour skim ‘Home Improvement/Re-roofing’ pour pansyoner atraver HFC ;

- SR 24 milyon pour skim sibvansyon ‘loan’ lakaz, ki administre par HFC

Serten lezot benefis i konm swivan;

En alokasyon SR 36 milyon in ganny fer koman konsesyon vwayaz. Msye spiker sa i kouver tiket bis pour dimoun aze, dimoun avek dezabilite e pli gro sonm i al anver dimoun ki pran de bis pou al travay - gouvènmman i sibvansyonn dezyenm parti sa vwayaz, sa ki nou dir ‘workers special’.

Msye Spiker, alawens bann etidyan pos-segonder, ti dernyen fwa ganny revize an 2014. Gouvènmman sa lannen ti ogmant alawens bann etidyan lo zil pros par SR pou kouver depans adisyonnèl ki zot bezwen fer pour nobou kontinny zot letid pos-segonder lo Mahe. Ver Avril 2025, alawens etidyan dan bann pos - segonder pou ogmante konm swivan - ki garanti en ogmantasyon minimòm 10%;

- Etidyan ki sorti dan segonder pou antre dan en program pos - segonder, alawens pour premye lannen pou sorti SR 850 pou mont SR 1,000, alawens pour dezyenm lannen pou sorti SR 950 pou mont SR 1,100 e pour trwazyenn lannen pou sorti SR 1,050 pou mont SR 1,200.
- Etidyan ki lo bann program ‘apprentiship’ zot alawens pou konm swivan ; i pou sorti SR 1,400 pou vinn SR 1,550 pou etidyan premye lannen e i pou sorti SR 1,600 pou mont SR 1,800 pou etidyan dezyenm lannen.
- Etidyan ki pe swiv letid pour en Diplòm dan Ledikasyon Primer ; pour premye lannen pou sorti SR 1,500 pou mont SR 1,700, alawens pour dezyenm lannen pou sorti SR 2,000 pou mont SR 2,200 e pour trwazyenn lannen pou sorti SR 2,500 pou mont SR 2,700.
- Etidyan ki pe swiv letid pour Diplòm dan Ledikasyon Segonder ; pou premye lannen, zot alawens pou sorti SR 2,000 pou mont SR 2,200, e, alawens pou dezyenm lannen pou sorti SR 2,500 pou mont SR 2,700.
- Etidyan ki pe swiv kour ADHM kot Lakademi Tourizm, zot alawens pou sorti SR 3,000 e vinn SR 3,200.
- Revi spesyal in ganny fer pour ‘mature students’. Nou konstate ki bokou etidyan anba sa kategori zot deza annan en fanmir e ki zot depans i bokou plis ki en etidyan normal. Ozordi Alawens pour bann ‘mature student’ i SR 1,800 dan tou sant profesyonnel - a leksepsyon Lenstiti bann ansenyan ki SR 6,000, si ou ti dan en lanplwa - e SR 3,000 si ou pa ti dan en lanplwa. Aparti Avril 2025, alawens ‘mature student’ dan tou sant profesyonnel pou mont SR 6,250 e pou bann etidyan kot Lenstiti bann Ansensyan i pou mont SR 7,343. Pour bann ki pa ti pe anploye avan kalifye pou antre dan en sant profesyonnel zot pou resewar 50% sa alawens. Tou bann ki dan sekter piblik

e zot anplwayer ki anvoy zot etidye a plen tan dan sant profesyonnel zot pou resevwar zot saler anliny avek PSO.

Msye spiker sa bann sanzman dan alawens pos segonder pou kout Gouvernman SR 7.6 milyon an 2025 e SR 10.1 milyon tou le zan, apre sa.

### **Benefis retrait/dezabilite ek envalidite**

Msye Spiker, mon pou aprezan tous benefis dezabilite, benefis envalidite e benefis retrait. Ozordi nou annan nou a pepe 14,550 dimoun ki pe resevwar sa trwa benefis. An 2022, Gouvernman ti donn en lasistans tanporer ziska en 'maximum' SR 500 pour endividi anba sa trwa benefis. Sa lasistans i ankor pe donner.

Me, aparti Avril 2025 sa program lasistans tanporer pou nepli egziste e gouvernman pou revwar sa trwa benefis konm swivan;

- Benefis retrait : si ou kalifye pour fon pansyon avek en benefis plis ki SR 3, 250 ou benefis retrait pou sorti SR 5,750 e mont SR 6,150. Si ou kalifye pour fon pansyon avek en benefis mwens ki SR 3, 250 ou benefis retrait pou sorti SR 5,750 e mont SR 6,400. Si ou pa kalifye fon pansyon ou benefis retrait pou sorti SR 5,750 e mont SR 6,650. Parkont, tou benefisyer ki ti ganny sekirite sosyal avan kreasyon Fon Pansyon ki ozordi zot benefis retrait i SR 6,250 zot benefis pou vinn SR 7,150.
- Benefis envalidite : si ou kalifye pour fon pansyon, ou benefis pou sorti SR 5,750 e mont SR 6,150. Si ou pa kalifye pour en benefis envalidite avek fon pansyon ou benefis pou sorti SR 5,750 e mont SR 6,650.
- Benefis dezabilite pou ogmante sorti SR 5,750 e vinn SR 6,650

Sa revizyon pou kout gouvernman SR 121 milyon an 2025 e SR 162 milyon tou le zan. Msye Spiker, zis sa 3 benefis tousel pou kout gouvernman en total SR 1.3 bilyon an 2025, sa sonm i reprezant 11% bidze total Nasyonal.

Msye Spiker, apard ki sa benefis retrait bann dimoun aze ki pe ogmante an Avril 2025, i osi annan lezot benefis adisyonel atraver bidze e sa i konm swivan:

- Zot kapab benefisyer avek tiket bis gratwit ki pour en maximum SR 1,680 par person, par mwan
- Si i kalifye pour en 'carer' a plen tan, i pou kout SR 7,633 aparti Avril 2025.

Sa i bann benefis avek en lenplikasyon moneter direk ki par mwan i kout an total SR 15,963 pour en pansyoner.

Msye Spiker, Mon anv sezi sa loportinite pou fer en lapel avek tou zanfan e tou pti zanfan ki annan zot manman/ papa e gran manman/ gran papa ki dan zot laz retret, pou soutenir zot, me non pa kontinyelman abiz lo zot. Msye Spiker dan bokou ka ou war ozordi ki bann dimoun aze ankor pe pran responsabilite primer dan en lakour ki pa sipoze leka. Sak adilt ki travay ki devret kapab pran son responsabilite anver son bann depans mon non pa depan lo larzan retret sa pansyonner.

## **18. Sekter Lakaz ek Later**

Msye Spiker, pandan sa 4an ki nou administrasyon in o pouvwar, sekter lakaz in reste enn nou priyorite e zefor remarkab in ganny fer pou ed nou popilasyon annan zot prop lakaz. Gouvernman in fer alokasyon en total 287 unit lakaz abordab depi Zanvye 2021 ziska la, pour en kou total SR 317.2 milyon. E osi 29 unit akomodasyon tanporer pour en lavaler SR 22 milyon.

Dan sa bidze, gouvernman pou met bann mezir e polisi pou siport Seselwa pou konstrir zot prop lakaz, e anmenmtan i pou kontinyelman envestir dan bann proze lakaz ek later.

Msye Spiker, an 2025, en alokasyon SR 527.2 milyon in ganny fer pour bann nouvo proze lakaz e sa i konm swivan:

- 30 younit, Ex-Desaubin (Faz 2) Takamaka – SR 10.4 milyon
- 80 younit - Zil Aurore (Faz 1)– SR 54 milyon
- 40 younit Vilaz Orkid (Faz 2) – SR 29.3 milyon
- 24 younit Corgate Estate (Faz 5) – SR 13.5 milyon
- 16 younit Union Vale (Faz 2) – SR 3.6 milyon
- 3 younit Lakaz “Emergency” Praslin – SR 3 milyon
- 16 younit Lari Hangard Mont Buxton - SR 13.9 milyon
- 4 younit lakaz “emergency” La Digue – SR 3.5 milyon e
- 16 younit “Mid Range Condos” Bel Air – SR 14 milyon

Anmenmtan, Msye Spiker nou pe ekspekte ki en total 156 units lakaz ki’n fini konmanse e pou konplete an 2025. E la nou pe koz sa bann proze swivan;

- Ex-Zelia, Anse Boileau – 24 units
- Anse Etoile (La Gogue) – 24 units
- Amitie Grand Anse Praslin -16 units
- Anse Francois Pointe Laure -16 units

- Waterloo St. Louis- 16 units
- Anse Poules Bleus (Faz 2) Baie Lazare -16 units
- Vilaz Zanblon (Faz 2) Cascade -24 units
- Lower Les Mamelles (Faz 2) - 8 units
- Ex-St Ange, La Digue -12 units
- E en total 56 ‘Mid-Range Condos’ Perseverance i osi ekspekte konplete e alokasyon lakaz ava fer an 2025.

Msye Spiker, an sa ki konsern proze ‘land bank’ pour 2025 en alokasyon SR 128.2 milyon in bidzete. Bann nouvo proze devlopman later ‘land bank’ ki pe ganny finanse anba bidze 2025 i konm swivan;

- Port Glaud/Port Launay – SR 8.5 milyon
- Caryole faz 2 – SR 2.4 milyon
- Grand Anse Praslin – SR 3.8 milyon
- Anse Kerlan, Praslin – SR 4.3 milyon
- Pti Lavil, Praslin – SR 2.6 milyon

I osi annan en alokasyon SR 20 milyon pou kontinny lezot proze ‘land bank’ ki’n deza konmanse e osi pou konplet sa bann proze swivan:

- Fond Azore Land Bank Extension - Baie Ste Anne
- Ex Deltel Dan Banbou Anse Royale
- Cap St Marie Land Bank – Anse Boileau
- Barbarons Land Bank
- La Retraite Land Bank

Msye Spiker, gouvènmman pe osi vin avek bann linisyativ avek lobzektif fasilite nou popilasyon pou swa repar oubyen konstrir zot prop lakaz. Enn nou partener kle dan sa demars i HFC. Gouvènmman in fer revizyon dan son bann fasilite ki HFC i deza pe ofer e entrodwir bann nouvo, pou fer son bann prodwi vin pli aksesib e abordab.

Mon pou monsyonn an zeneral bann revizyon e nouvo prodwir e HFC pou plitar donn plis detay;

Prenan kont ogmantasyon dan pri konstriksyon ki annan lefe lo kou pou konstrir en lakaz, HFC pou ogmant sonm ‘maximum loan’ ki i ofer pou sa bann kategori loan swivan:

- Premye Loan lakaz: Pou ogmante sorti SR 1.2 milyon pou vin SR 1.5 milyon

- Loan pour en Dezyenm lakaz (Second Housing loan): Pou ogmante sorti SR 550 mil pou vin SR 850 mil
- Loan pou kouver lakaz konpletman (complete re-roofing): Pou ogmante sorti SR 100 mil pou vin SR 150 mil
- Skim pou lagrandisman lakaz (House Extension Scheme): Pou ogmante sorti SR 100 mil pou vin SR 300 mil
- Skim pansyoner pou re-kouver lakaz konpletman (Pensioner Home Improvement Loan): Loan pou ogmante sorti SR100 mil pou vin SR150 mil

Msye Spiker, saler maksimonm pou kalifye pou serten kategori loan pou osi ogmante konm swivan:

- Loan pour renovasyon mazer; Saler pou ogmante sorti SR 20 mil pou vin SR 25 mil (net) par mwan
- Home Improvement Loan; Saler pou ogmante sorti SR 15 mil pou vin SR 20 mil (net) par mwan
- Complete Re-Roofing Loan; Saler pou ogmante sorti SR 15 mil pou vin SR 20 mil (net) par mwan
- Survey Loan; Saler pou ogmante sorti SR 20 mil pou vin SR 30 mil (net) par mwan

Nou pe osi ogmant pousantaz repeyman vizavi saler aplikan (Debt service Ratio), ki pou ogmante sorti 30% a 40% pou vin 30% a 45% pou premye e dezyenm loan pou konstrir lakaz e osi loan pou agrandi lakaz.

En lot sanzman dan polisi HFC se ki aparti Zanvyè 2025, HFC pou konmans aksepte ‘second line charge’ koman garanti pou serten fasilite - me sa i pou depan lo serten kondisyon ki HFC i ava elabor lo la pli tar.

En lot konsiderasyon kot i konsern garanti pour ‘*home improvement*’ e ‘*complete re-roofing loan*’, HFC pou konsider met en sekirite lo sa propriyete koman lipotek dan plas ki sa aplikan i bezwen en garanter. Sa pou aplikab dan ka kot en aplikan i annan en propriyete e i dan en lanplwa stab, laranzman pou ganny fer ek son landrwa travay pour son repeyman ‘*loan*’ i ganny dedwir lo son saler tou le mwan.

Msye Spiker an se moman laz maksimonm ki en kliyan i gannyen pou repey son loan i 65 an baze lo laz retret. Aparti 2025, HFC pou konsider peryod repeyman apre 65 an, dan ka kot i annan 2 aplikan kot laz sa dimoun pli aze a ganny konsidere si zot satisfè lezot kondisyon. Sa i pou aplik pou premye e dezyenm loan lakaz selman.



Msye Spiker bann lezot revizyon dan bann fasilite ki HFC i ofer i konm swivan:

- Loan pou renovasyon mazer: Konstriksyon ‘*boundary walls*’ e osi reparasyon miner pou ganny azoute lo lalis proze ki kalifye anba sa fasilite
- Skim pansyoner pour renovasyon lakaz: En pansyoner ki’n deza fer laplikasyon pour en loan anba sa skim i pou aprezan kapab refer laplikasyon pour en lot, si in fini repey sa enn avan. Me i byen note i pa pou benefisye avek sa 25% sibvansyon e son dediksyon pou ganny fer direkteman lo son pansyon. En lot revizyon anba sa skim se ki pansyoner ki annan plis ki 75 an pou kapab fer laplikasyon pour en loan renovasyon lakaz me i pou annan kondisyon atase ki HFC i ava donn plis detay lo la plitar
- Skim pou agrandir lakaz: Aplikan pou aprezan kapab agrandir lezot parti zot lakaz dan plas zis lasanm. Konstriksyon “bedsitter” pou osi ganny konsidere.

Msye Spiker, HFC pou osi entrodwir sa bann nouvo prodwi e skim an 2025;

- Skim pou lagrandisman vertikal (Vertical Extension Scheme): Sa skim i pou ankouraz paran pou donn permisyon zot zanfandan pou azout en bout par lao zot lakaz. Apre ki paran in donn son zanfandan permisyon i kapab fer laplikasyon anba sa skim. Maksimonm loan pou SR 950,000.
- Skim Emergency Loan pour pansyoner; Sa nouvo skim i pou asiste sa group vilnerab dan bann sikonstans dezas kot zot kapab ganny akse avek en loan pou ranplas ou repar bann lekiman de baz e sistenm parey elektrik, desarz etc ki’n ganny andomaze. Maksimonm loan pou SR10,000.
- Loan “Home Carer”, dezabilite ek envalidite pour renovasyon/ amelyorasyon lakaz: Prenan kont natir zot travay i fer li difisil pou bann ‘home carers’ kalifye pour en loan ek labank, sa loan i pou ed bann Home Carers ganny akse avek plis finansman pou fer renovasyon zot lakaz, kas ros, lanbelisman kot zot lakaz e osi pou rekouver zot lakaz. Maksimonm loan pour renovasyon i SR 50,000 e pou rekouver zot lakaz i SR 150,000.

Msye Spiker, ozordi HFC pe aplik de diferan to lentere pour premye e dezyenm loan lakaz depandan lo kantite loan ki sa aplikan i kalifye. Pour en loan ziska SR 500 mil - to lentere i 7% e en to lentere 8 % pe ganny aplike pour en loan par lao R 500 mil ziska SR 1.2 milyon. Sa de to lentere i o konpare avek menm kalite loan ki labank komersyal pe ofer ki fer li pa abordab espesyalman pou aplikan ki zot saler i pli ba ki SR 20,000.

Pou asire ki HFC pe zwe son rol pou ofer loan abordab, aparti le 1 Zanvye 2025 - to lentere lo loan pou konstrir e osi pou fer devlopman vertikal pou vin 6% pou

aplikan ki zot saler i pli ba ki SR 20, 000. Gouvernman pou sibvansyon sa diferans ki HFC i sarze e sa in estimen pou kout apepre SR 1 milyon.

## **19. Sekter Transportasyon**

Msye Spiker, gouvernman i reste angaze ek lenvestisman kontinyel dan sekter transportasyon pou amelyor kondisyon nou semen, konektivite, sirkilasyon e sekirite lo semen e osi siport lekonomi pou agrandi. En sonm SR 161.6 milyon in bidzete an 2025 pour lenvestisman kapital dan sa sekter.

Bann nouvo proze semen ki pou ganny finanse dan sa bidze 2025 i enkli:

- Access Road La Gogue Dam site- SR 2.5 milyon
- Amelyorasyon semen Kan Per, Praslin – SR 2 milyon
- Agrandisman semen Val den Dor (faz 2) - SR 1 milyon
- Dezyenm faz Gran Riviere, Anse Royale - SR 4 milyon
- Amelyorasyon semen Vilaz Pascal - Beau Vallon – SR 1.5 milyon
- Amelyorasyon ‘link’ semen Ma Joie (Faz 2)- SR 1.5 milyon
- Bann proze mazer dan sa sekter ki ekspekte konplete an 2025 i Stasyon teste transpor Praslin e sa i en sonm SR 1.9 milyon in bidzete.

En provizyon SR 32.5 milyon pou konplet proze semen was Mahe.

Msye Spiker, problemn konzasyon trafik sirtou dan bomaten avan travay konmanse e apre travay i reste en sours fistrasyon pour motoris. Solisyon pou rezourd sa problemn i konplike anv kontrent lespas pou fer semen adisyonel. Malgre sa bann defi, gouvernman pe kontinyen rod opsyon pou amelyor sirkilasyon trafik. Avek sa antet, en proze ‘third lane’ Pointe Larue in deza konmanse e sa i ekspekte konplete ver 2027. Sa proze i konmans kot erport e termin Anse Faure ki pou konekte avek Ile Soleil.

Premye faz proze i ekspekte konplete finisyon sa lannen e i ekspekte kout SR 7 milyon. Dezyenm faz sa proze ki konmans kot terminal kargo e pou fini kot lakonpanyen Amalgamated Tobacco, pe pas dan prosedir Tender e i ekspekte konmanse sa lannen. En sonm SR 13.6 milyon in ganny bidzete an 2025 pou fer faz 2 ek 3 sa proze. Trwazyenm faz pou konmans kot lakonpanyen Amalgamated Tobacco ziska Anse Faure e konekte avek Ile Soleil.

En lot proze ki pe ganny finanse dan sa bidze pou ede amelyor sirkilasyon trafik i amelyorasyon ron pwen Providence ki pou al kot CCCL e lagrandisman ‘lane

stand by' pou al lo zone 18. En sonm SR 1 milyon in bidzete an 2025 pour sa proze.

I dan plan SLTA pou resirfas 30 kilomet semen primer ensi ki segonder e en sonm SR 71 milyon in ganny fer provizyon dan sa bidze 2025.

An sa ki konsern amelyor sekirite lo semen, e osi ede pour sirkilasyon trafik, en lot provizyon SR 1 milyon in fer pour en letid konmanse pou evalye bann landrwa kot nou kapab konstrir bann 'overhead bridge'. En sonm SR 1.5 milyon in osi ganny enkli dan sa bidze pou rekonstrir e mentenir bann pon ki zot striktir pe ganny andomaze.

Touzour an sa ki konsern sekirite lo semen, nou'n fer en alokasyon SR 7.9 milyon dan bidze 2025 pou finans ankor 50 lalimyer dan sak distrik lo Mahe, Praslin ek La Digue. I byen note ki depi Zanvye 2021 ziska la - en total 3,450 nouvo lalimyer in ganny enstale e apepre SR 22 milyon in ganny depanse pou enstal e mentenir sa bann lalimyer.

Nou pe osi fer en alokasyon SR 5.5 milyon pour konstriksyon e mentenir drenaz ek trotwar dan bann distrik.

Msye Spiker, gouvènmman pou kontinyen sipòrt devlopman kapital pour SPTC. Dan mwayen term en sonm SR 42.7 milyon pou al anver akizisyon nouvo bis, ki pou enkli 2 bis elektrik pou etidye fezabilite bann tel bis. En sonm SR40 milyon pe osi ganny bidzete pou kouver bann proze lenfrastruktir.

Msye Spiker, an sa ki konsern nou bann fasilite portyer, Lotorite Por Sesel in pandan sa bann dernyen lannen angaz li dan redevlopman e konstriksyon nouvo fasilite. Lobzektiv se pou donn en meyer servis a tou bann ki servi sa bann fasilite. Sesel pe devlop vitman e Lotorite Por pe trouv li dan en pozisyon kot i bezwen akseler devlopman son bann fasilite.

An 2023, Praslin in ganny li en nouvo terminal pasaze, apele ERO, ki konstriksyon ti konmanse an 2021 lo Zil Eve. I dan plan Lotorite Por pou kontinyen amelyor sa terminal pou azout bann servis esansyel pou desarze e stokaz kargo. An 2024, en lekspresyon lentere pou fer devlopman lo later lo Zil Eve, ki osi ganny zere par Lotorite Por, ti ganny fer par Bord Lenvestisman Sesel. Nou'n vwar partisipasyon 3 investiser kin ganny bay pou fer bann devlopman komersyal e en marina. Nou

ekspekte ki plis devlope prive lo Praslin i pran sa bann loportinite ki pe ganny met a zot dispozisyon, pou kontinyen anmenn devlopman lo sa zil.

Msye Spiker, Lotorite Por i annan plan pou konstrir en nouvo terminal pasaze lo por La Digue lannen prosenn, ki ava founi zot avek plis konfor ler zot pe esper bato. Dan plan pour sa nouvo terminal i annan lespas komersyal pour bann Digwa kapab lwe pou fer zot biznes.

Zis pou fer rapel ki por La Digue in fek fini pas anba en travay pou agrandi sa fasilite pou permet pli gro bato koste por. Lobzektif sa proze se pou separ pasaze ek kargo, pou rann li pli konvenab pour tou bann ki servi sa pti por.

Msye Spiker, depi 2018, Lotorite Por pe zer bann morso later e fasilite portyer Bel Ombre. Sa lotorite i dan faz pe rod investiser pou fer bann devlopman komersyal lo sa bann morso later. I annan pour le moman en investiser ki pe al ganny bay pour en morso later pou fer en devlopman komersyal e touristik.

Msye Spiker, pli gro proze Lotorite Por se byensir lagrandisman Por Komersyal ki deservi bann bato ‘container’, tenker ek bato ki transport siman. Esansyelman se sa por ki fasilite tranzaksyon komers nou pei avek larestan lemond, atraver eksportasyon ek lenportasyon. Sa por ki ti selebre son 50 an 2023 i kritik pou lekonomi nou pei. Nou pe war ki lakantite container ki pe rantre dan pei pe ogmante. Pour sa 2 dernyen lannen nou war plis ki 80 mil TEU, ekivalan 20 pye pas dan Por Komersyal. Nou ekspekte sa lannen ki plis ki 90 mil TEU i pas atraver nou Por. Sa por i dan en leta ase degrade e i plis ki ler pou sa ekstansyon ganny fer.

Lekspresyon lentere pou konstriksyon lasose ti lanse an Mars sa lannen e nou ekspekte ki ‘tender’ pou lanse mwan prosen. Sa pou fer ki kontrakter prefere pou ganny anonse an Avril lannen prosenn e konstriksyon pou konmanse an Novanm 2025. Sa proze ki anvizaze ganny fer dan 2 an i ekspekte fini an Me 2027.

Lekspresyon lentere pou operater ‘container’ pou lanse a la fen sa lannen, e nou ekspekte ki alafen 2025 kontra pou’n fini ganny sinnyen avek sa operater ki pou investir dan bann lenfrastruktir par deryer lasose (sa ki nou apel ‘back of quay facilities’) tel ki bann ‘yard’, ‘warehouse’, lofis administratif pour sa operater e fasilite pou ladwann e lezot lazans ki kontrol lafrontyer, e dan bann lekipman konman ‘mobile harbour cranes’ pou deservi bann pli gro bato e pli modern ki napa ‘crane’ abor. Dapre program sa proze, loperasyon lo nouvo terminal i sipoze konmanse an Zanvye 2028.

## 20. Sekter Lanvironman, Lenerzi ek Sanzman Klima

Msye Spiker, lefe sanzman klima e son lenpak lo nou lanvironman e nou sosyete an zeneral i reste pli gran defi pour nou pei dan sa peryod ki nou pe viv ladan. Pour Sesel, lefe sanzman klima nepli enn ki nou zis koz lo la koman en keksoz ki pou arive dan lavenir, me in fini vin en realite. Tou le zour nou war lefe lo nou lakot koze par nivo lanmer kin mont pli O. Nou war plis bann lensidan klimatik pli sever, parey plis lapli ki koz linondasyon e deboulir later. Nou pou osi war sanzman dan tanperatir e osi bann peryod letan abnormal, kot swa nou kapab ganny plis lapli oubyen nou letan sek i prolonze. Nou war bann levennman kot nou bann koray pe ganny detrir aköz nivo tanperatir losean i pli O.

Frer/ser Seselwa sa i en keksoz serye ki nou pe fer fas avek. Legzistans nou pei i an kestyon. In ler pour nou met lide e zefor ansanm pou protez nou pei e ed li adapte avek sanzman klima.

Parey nou okouran, zefor pour nou minimiz e adapte ek lefe sanzman klima pou kout bokou larzan. Bann letid fer par gouvèrnman Sesel avek sipor bann eksper enternasyonal anba 'Nationally Determined Contributions' in estimen i kapab kout US\$670 milyon pou enplimant sa bann mezir. Sa i en sonm larzan ki Sesel pa pou kapab aford lo li menm.

Gouvèrnman in fini konmans demars pou mobiliz finansman pou enplimant diferan mezir. Avan finisyon sa lannen nou pou adopte en stratezi pour nou mobiliz resours finansman relye avek sanzman klima 2025-2030. Pou note gouvèrnman in konmans mobiliz resours domestik par lentrodiksyon en taks lanvironnman soutenabilite lo bann viziter.

An Fevriye 2025, Gouvèrnman pe organiz en 'roundtable' enternasyonal avek led Fon Moneter Enternasyonal pou anmenn diferan partener domestik ek enternasyonal pou diskite lo bann diferan lasistans ki Sesel i kapab gannye pou ed li mobiliz resours finansyel ek teknik pou enplimant son bann proze ek linisyativ pou konbat kont lefe sanzman klima e osi adaptasyon.

Lo kote enternasyonal Sesel i ankor pe lite pou fer sir i osi kapab benefisye avek bann promes kin ganny fer; par egzanp pour "loss and damage fund". Sesel i ganny reprezante dan sa bann forum, kot nou toultan servi loportinite pou prezant nou pozisyon, me parey zot konnen progre i dousman e pa toultan ekitab.

Msye Spiker dan mon ladres bidze lannen pase, mon ti anonse ki i kritik ki nou pei i akseler son tranzisyon ver lenerzi renouvlab. Sa i pa zis akòz lefe negativ lo lanvironman e klima ki sistenm prodiksyon elektrisite an servi karbiran i anmennen, me osi pou rezon stratejik pou asire ki Sesel pa ganny afekte avek bann tansyon zeo politik ki bokou letan i enflyans pri karbiran.

Avek sa Msye Spiker, gouvènmman pe akseler son zefor avek bann mezir spesifik pou kapab prodwi plis elektrisite atraver bann sours renouvlab. An term prodiksyon, travay lo en nouvo 'PV floating lagoon' in komanse e sa i ekspekte prodwir 5 MGW lenerzi. Gouvènmman ansanm ek PUC i osi dan diskisyon tre avanse avek en lot lakonpanyen ki prodwi lenerzi renouvlab pou konmans en proze ki annan potansyel pou prodwi aprepre 2.5 MGW lenerzi La Digue e osi 4.5 MWH sistenm batri ki stor lenerzi, e osi 6 MGW lo Mahe, ki ekivalan 1.5% nou konsomasyon.

Enn bann kontrent pli sever ki nou fer fas avek dan prodiksyon lenerzi renouvlab se nou napa ase later pou enstal par egzanp bann pano soler. Pou adres sa problemn i esansyel ki nou servi maksimonm nou bann twatir pou enstal bann pano soler. Pou fer sa arive, gouvènmman pe met anplas en nouvo skim pou ankouraz plis lakaz rezidansyel e osi biznes pou al dan sa direksyon. Sa i ava ranplas sa skim avan ki ti nepli pe marse.

Pour lannen 2025, gouvènmman pe revwar skim 'PV Rebate' dan son totalite avek bi pou relans li pou ankouraz plis lenvestisman par konsomater rezidansyel e bann pti biznes.

Sa nouvo skim pou donn endividi ki enstal en sistenm PV en rediksyon lo zot kou total ki pou ganny peye par gouvènmman konm swivan;

- Pour en sistenm avek kapasite 1KW – SR 10,500
- Pour en sistenm avek kapasite 2KW – SR 21,000 e
- Pour en sistenm avek kapasite 3 KW - SR 31,500

Pour pti biznes ki annan en reveni pli ba ki SR 6 milyon benefis pou konm swivan;

- Pour en sistenm avek kapasite 5KW – SR 36,000
- Pour en sistenm avek kapasite 10KW – SR 72,000 e

- Pour en sistenm avek kapasite 15KW - SR 108,000

Anplis ki sa, anba sa skim, konsomater rezidansyel pou kapab pret larzan avek labank komersyal pour en ‘loan’ ziska SR 150,000 avek en to lentera 5%, avek en repeyman ki pou ganny fer pandan en maksimonm 7 an. Sa i ava ede ki plis endividi i satisfere kriter labank pou akse sa ‘loan’. E pour bann pti biznes, zot pou kapab pret larzan avek labank komersyal pour en ‘loan’ ziska SR 250,000 avek en to lentera 5% e repeyman pou ganny fer pandan en peryod maksimonm 5 an.

Dan bidze 2025, gouvènmàn in met en sonm SR 5 milyon pou sa kontribisyon anver sibvansyon sa linisyativ pano soler, e SR 2 milyon pou sibvansyon sa to lentera ki labank komersyal i sarze. Alor mon demann konsomater rezidansyel e sa kategori biznes pou pran sa bann loportinite pou fer sa lenvestisman ki zot a kapab war en rediksyon lo zot pri elektrisite.

Msye Spiker, gouvènmàn pe osi bezwen fer son bout. Ozordi gouvènmàn pe depans anviron SR 160 milyon an mwayenn par lannen lo peyman elektrisite. Alor an 2025, en sonm SR 10 milyon in bidzete pou investir dan lenstalasyon pano soler lo twatir bann batiman Gouvènmàn.

Pou ankouraz bann biznes ki dan sekter lenerzi renouvlab, sa lannen, gouvènmàn in donn senk an adisyonnèl konman benefis pour bann lakonpanyen an term ‘loss carry forward’.

Gouvènmàn i osi realiz lenportans prodiksyon lenerzi renouvlab. Me pou sa vinn en realite nou bezwen osi asire ki nou grid distribisyon lenerzi i kapab soutenir prodiksyon eleve ki nou antisipe dan sa sekter. Nou pou bezwen osi repozisyon PUC pour li kapab partisip dan sa transformasyon. Pour sa arive bokou lenvestisman dan grid distribisyon pou bezwen ganny fer. Sa pou osi ganny siporte avek bann evalyasyon e lezot lasistans teknik.

Gouvènmàn i dan diskisyon avanse avek Labank Mondyal ek lezot partener pou siport sa linisyativ lo en plan teknik ek finansyer. Sa i pou ariv en kou preski US\$37.3 milyon ki nou ava prete avek bann kondisyon vreman konsyèsionnel a lon term.

Nou osi pe finaliz en plan resours entegre pour sekter lenerzi, ki pou etabli en lapros kordinen dan tranzisyon anver bann sours lenerzi renouvlab. Sa plan i

ekspekte konplete ver lafen Mars 2025. Sa plan i ava ed nou pou vwar lezot lenvestisman ki nou bezwen fer dan sekter.

Lo kote proze adaptasyon kont lenpak sanzman klima, gouvèrnman pe osi fer en alokasyon SR 18.1 milyon dan sa bann proze swivan;

- Proze rehabilitasyon lakot Anse Konsolasyon - SR 2.7 milyon
- Proze rehabilitasyon lakot Aux Cap - SR 2.7 milyon
- Konstriksyon Drenaz Carana- SR 2.7 milyon
- Amelyorasyon dan kapasite pou retir delo dan plato La Digue - SR 1.4 milyon e
- Amenazman e lentegrasyon sistenm lakot Anse Royale Beach Park - SR 2.7 milyon

Msye Spiker, pli ale nou pe war plis lenpak sanzman klima lo nou bann lenfrakstriktir obor lakot ki enkli semen. Koman en pei nou bezwen vin pli aktiv lo proteksyon e rehabilitasyon nou bann lenfrastriktir kont sanzman klima. Anlinny ek sa - en sonm SR 115 milyon in mete dan bidze pour sa prosen 3 an pour SLTA enplimant proze proteksyon e rehabilitasyon lenfrakstriktir semen lo lakot.

Bokou resours e lenvestisman in ganny mete dan sa sekter, me nou pou bezwen fer plis ankor a lavenir pour nou kapab finans sa stratezi. Avek lespas fiskal nou pe prozekte SR 37 milyon an 2026 e SR 62 milyon an 2027 pour nouvo proze ki relye ek sanzman klima.

Msye Spiker, en lot gro problem ki nou pe fer fas avek i amenazman salte. An 2025 i annan diferan mezir ki nou pe finanse dan sa domenn. Nou'n fer en alokasyon SR 17.9 milyon pour proze amenazman 'Solid Waste'. Bann konponan enportan sa proze se pou revwar amenazman salte lo 'landfill'. Nou pou bezwen reorganiz litalizasyon lespas lo 'landfill' ki ava ed nou ogmant son kantite letan ki nou kapab servi li ankor. En lot konponan sa proze se pou entrodwi bann mezir pou promouvwar 'circularity' e osi redwir salte ki pe ariv kot 'landfill'. Analiz ki'n ganny fer, in war ki plis ki 40% salte, i bann ki nou kapab fer konpost avek. Sa bann mezir a kapab kre nouvo loportinite biznes pour nou sekter prive.

Msye Spiker, Sesel pe kontinyelman fer fas avek lenpak sanzman klima, kot konmela nou pe eksperyans plis peryod gro lapli, lanmer mont e linondasyon. Le 6 Desanm 2023 ti montre nou ki mannyer nou tre vilnerab kont sa bann eleman natirel. Alor pou esey redwir lenpak sa bann katastrof natirel, gouvèrnman pe fer en alokasyon SR 14.7 milyon anba bidze Divizyon Amenazman Risk relye ek



Dezas. Sa alokasyon in vin apre apre ki en analiz ti ganny fer e idantifye bann landrwa en pe pli kritik ki bezwen stabilizasyon pou redwir lenpak bann aksyon parey glisman later e ros. En alokasyon in ganny fer dan bidze 2025 pour ki sa proze i demare. Dezyenm faz sa proze pou ganny fer en 2026.

Bann levennman advers parey gro lapli e deboulisman later pe vinn pli souvan an reziltan sanzman klima. sa i annan en lenpak direk lo bidze pei kot bann depans enprevi i bezwen ganny fer dan 'Contingency Fund'. Sa metod i nepli efikas e nou pe travay lo en nouvo striktir pou annan en 'Disaster Financing Strategy". Sa i ava ed nou planifye pli byen e osi asire ki nou annan resours finansyel pou fer fas avek bann dezas ki arive. Gouvernman i an diskisyon tre avanse pou finaliz en program ki ava ed nou servi bann diferan lenstriman finansyel pou adres bann kou ler en dezas i arive. Sa i ava enkli en Fon Rezerv ki ava akimile ek letan e ki kapab ganny servi letan en evantyalite i arive.

Sa bann linisyativ pou nesisit revwar lankadreman Zesyon Fon Piblik pour nou enplimant sa bann sanzman. En provizyon dan konstitisyon e lalwa ki govern Zesyon Fon Piblik i deza etabli en 'Contingency Fund'. Me nou bezwen revwar sa lankadreman pou fer sir nou azour avek realite ozordi.

## **21. Transformasyon Ekonomik**

Msye Spiker, transformasyon ekonomik i reste la baz pour ki nou lekonomi i kontinyen agrandi, vin pli rezilyan e kree plis larises pour nou popilasyon. Diversifikasyon nou lekonomi i reste en priyorite, me selman i annan bokou defi pou realiz sa lanbisyon, sa i akoz grander nou pei, en mankman later e osi lezot resours natirel. Sa i vedir ki nou bezwen konsantre lo selman serten sekter ki nou annan lavantaz ladan.

Nou war ki nou sekter finansyel, avek nimerik i kontinyen agrandi avek bann linisyativ ki governman i met anplas.

An 2025, governman pou kontinyen ek son azanda pou transform nou lekonomi atraver bann lenvestisman dan sekter ekonomik e bann polisi ek mezir pou fasilite fer biznes dan pei.

En total SR 49 milyon pou ganny investir dan bann lenfrakstriktir pou siport pti e mwayen biznes lannen prosenn. Nou annan en;

- Nouvo sant mikro antrepriz Anse Aux Pins – kot SR 5 milyon in ganny bidzete an 2025 pou konmans konstriksyon sa sant ki pou kout en total SR 23 milyon
- Nouvo sant antrepriz ‘Marine and Auto Industrial Park’ – SR 3 milyon
- Perseverance ‘Bulk Infrastructures’ – SR 5.8 milyon
- Renovasyon Sant mikro antrepriz Grand Anse Praslin – SR 2.9 milyon
- Developman lenfrakstriktir faz 2 lo Zil Eve – SR 25.5 milyon
- Proze drenaz, lenfrastriktir semen ek trotwar dan zone endistriyel Providence – SR 6.2 milyon
- Proze developman Beau Vallon - En sonm SR 7.5 milyon in ganny mete dan bidze pour sa proze ki ekspekte konplete an Fevriye 2025. Bann aktivite e fasilite pou konmanse ver Zen 2025 vi ki apre konstriksyon i pou pran en pe letan pou bann alokater enstal zot bann lekipman. Sa bann kiosks pou donn loportinite 40 pti e mwayen biznes pou montre e vann zot bann prodwi.

Msye Spiker, Victoria Waterfront i annan en rol enportan pou zwe dan fer nou kapital vin pli atiran e dinamik pour tou rezidan ek touris, e gouvènmman i angaze pou transform Victoria Waterfront dan en sant kiltirel ek komersyal vivan. Redevlopman pou arive par faz, Faz 1 i konpri ansyen landrwa kot ‘ex-children playground’. Sa landrwa in ganny divize dan sa bann ‘zone’ swivan:

- a) Zone A – Vilaz Kreol pou ofer en leksperyans kiltirel ek gastronomik ki selebre vre kiltir Seselwa, ki enkli en restoran Kreol.
- b) Zone B pour en ‘zone’ Diverstisman, avek kantite kalite aktivite pour tou laz dimoun.
- c) Zone C – En ‘waterpark’ e
- d) Zone D – En Boardwalk/Marina avek bi pour vin en gran pronmnad dan Waterfront, ki osi enkli en lotel ki pou annan en limit 30 lasanm.

Nou espere ki premye kar 2025, tou louvraz ‘tender’ pou ganny akorde e bann investiser pou kapab konmans prosedir pou fer devlopman. Plan pou dezyenm faz pe ganny diskite e an 2025 gouvènmman pou partaz konsep pour sa faz.’

Msye Spiker, parey mon ti mansyonnen dan mon diskour pour lannen 2024, pour nou kapab bouz lo prosen staz devlopman ekonomik, nou pou bezwen plis later. Alors gouvènmman i annan plan reklamasyon e en provizyon SR 51.6 milyon in ganny fer dan bidze 2025. Sa i anplis ki sa sonm SR 279 milyon ki ti dan bidze 2024. Sa proze pou enkli;

- Ogmant stok disab pour konstriksyon ki pou ekivalan ant 500,000 a 800,000 met kib
- Agrandisman Ile Aurore par 180,000 met kare
- Agrandisman Zone 20 par 110,000 met kare
- Developman Zone 5 par 240,000 met kare

Msye Spiker, Minister Lenvestisman, Lantreprenarya e Lendistri in travay pour plis ki 3an avek bann diferan Minister, Departman pou revwar bann prosedir e standar pou amelyor lanvironman biznes. Sa i avek bi fer bann prosedir vin pli fasil e pli transparan.

Gouvernman pe etabli en Unit ki pou tonm direk dan Minister Lenvestisman, Lantreprenarya e Lendistri, pou asiste biznes pou ede donn gidans e kordin avek lezot minister. Sa i avek bi azir koman en azan lo par biznes ki ava pe zet en regar direk lo sak problem ki ganny met devan an relasyon avek servis Gouvernmanmenm avan zot ariv sa pwen pou soumet zot laplikasyon kot biro Licensing.

Sa unit pou finalman ganny agrandi pou vin en sant fasilasyon biznes permanan. Proze i dan staz ‘design’ e i pou demare lannen prosenn. Sa sant pou dedye koman en pwen kot biznes pou ganny akse avek lamazorite bann servis gouvernman. Menm konsepe pou ganny adopte, kot nou pou met bokou lanfaz lo ‘*customer service*’ kot en biznes ava ganny konsey e kapab fer tranzaksyon dan en sel landrwa dan plas bezwen al kot plizyer landrwa, parey i ete konmela.

Antretan, gouvernman pe kontinny son travay pou amelyor ‘Ease of Doing Business’ dan en fason pli vit e pli direk. Sa i an akor avek nou zefor pou bouz nimerik dan laplipar nou bann servis. Travay i kontinyen pou develop nou ‘*Investment Portal*’. Sa i sa platform nimerik ki pou permet envestiser e biznes fer zot bann demars virtuelman. Sa proze in antre dan staz evaliasyon e i ekspekte konplete an 2025. Sa sistenm pou anmenn plis efikasite dan bokou bann prosedir ki en biznes i bezwen tel parey, anrezistremen biznes, laplikasyon GOP, laplikasyon license, permi lenportasyon e lezot.

Msye Spiker parey tou dimoun i okouran, pou nenport ki sistenm nimerik marse, sa prosedir ki souligny sa bann servis i bezwen modernize li osi. Alors, pou siport nou demars, Minister Lenvestisman pe met bokou lanfaz pou moderniz nou bann lalwa ‘licensing’ ki tonm anba biro ‘Licensing’. Travay pe ganny fer lo tou regilasyon

neseser. Nide se pou retir bann gran prosedir birokrasi, konsiltasyon ki met baryer pou en biznes ganny en license. Sa i pou fasilite bann prosedir ki ava fer li pli vit pou biznes ganny en license. Par kont, an fezan sa - bokou plis responsabilite pou bezwen tonm lo sa biznes limenm pou fer sir ki tou son bann standar i an plas. Pareyman, provizyon ava ganny fer pou ki bann ki pa respekte standar i ganny penalize.

Parey ou vwar Msye Spiker, sa gouvènmman i pe pran askyon serye dan bann landrwa konsènen. Nou lèntere se fer plis pou retir firstrasyon vi ki sa fason fer in enkilke pandan plizyè lannen, i pou bezwen annan en sanzman dan latid e fason fer e panse parmi plizyè antite. Gouvènmman i angaje pou fer sa arive.

Dan sa menm lalinny byento gouvènmman pe al entrodwir en linisyativ ki apel zero birokrasi. Anba sa program tou minis ek lazans pou ganny demande pou idantifye bann prosedir birokratik e propoz nouvo fason fer pou retir sa bann lobstak. Sa pou ganny fer pandan en peryod 4 mwan, lannen prosenn. Sa legzersis ava ganny fer tout an konsiltasyon avek manm piblik, biznes e sosyete sivil.

Msye spiker en lot linisyativ ki gouvènmman pe pran pou amelyor lanvironnman biznes i lèntrodikeyon en lakour komersyal. Sa lakour pou ekout zis bann ka ki annan sa laspe komersyal - tel ki lasirans, tranzasyon finansyer e pre ki enkli kontra, propriyete entelektyel, parmi lezot ankor. Sa i ava permet bann tel ka ganny 'deal' avek pli vit e en rezolisyon a ganny pran pli vit.

Sa lakour pou form par Lakour Siprenm e i pou annan en ziz a plen tan. Sa ziz pou annan pa plis ki 6 mwan pou rann zizman ou en rezolisyon dan en ka. En sonm SR 4.9 milyon in ganny bidzete an 2025 pour loperasyon sa lakour.

## **22. Sekter Lapes ek Lekonomi Ble**

Msye Spiker, nou'n osi investir bokou larzan dan bann fasilite atraver pei e nou'n gard nou promes pou amelyor kalite lavi nou bann peser. Bann proze por, bazar, gear store, pou kontinyen lannen prosenn avek nouvo fasilite modern dan sa bann distrik swivan:

- Fasilite Lapes – Anse La Mouche
- Fasilite Lapes- English River
- Fasilite Lapes- Glacis - pou konplete 2025

Msye spiker avek proze “dredging” ki lotorite por pe fer dan distrik Belombre sa pou ed bann peser dan sa distrik.

Travay i ekspekte konmanse tar sa lannen pou developman lenfrastruktir lo Ile Du Port, e lannen prosenn en alokasyon SR 42 milyon in ganny mete dan bidze pour sa proze. Sa pou enkli nouvo semen, lenfrastruktir desarz, delo, elektrisite ek telekominikasyon. Ile du Port in ganny demarke koman en landrwa kot sekter ‘fish processing’ pou baze.

Aparti Zanvye 2025 Lotorite Lapes Sesel (SFA) an partenarya avek Linyon Eropeen pou entrodwi en nouvo skim pansyon pou ankouraz peser kontribye anver zot Pansyon lo en baz volonter. Tou peser ki enterese pou partisip dan sa skim, zot bezwen kontribye 5% e SFA pou kontribye sa lot 5%. En sonm SR 500,000 pou ganny bidzete toulezan par SFA. Dan sa skim, labaz kontribisyon pou baze lo saler minimonm.

Gouvernman pe osi fasilite negosyasyon ant bann ‘stevedores’e bann lazans ki anploy zot pou revwar zot benefis.

### **23. Sekter Lagrikiltir**

Msye Spiker, bidze pour sekter lagrikiltir pour lannen 2025 i SR 142 milyon. Priyorite gouvernman i reste pou ogmant prodiksyon agrikol, amelyor valer azoute, fer sa sekter vinn pli soutenab e anmenn nouvo teknolozi. Gouvernman pe kontinyelman etidye pli bon fason pou siport sa sekter e alor nou pou osi amelyor alokasyon kredi pour lenvestisman dan lagrikiltir e amelyor konesans bann fermye ek bann biznes.

Msye Spiker, pou fasilite akse avek finansman pour fermye, pou annan serten lamanman dan skim Fon Devlopman pour Lagrikiltir (ADF) pour lannen 2025. Anba sa skim an se moman, en later lagrikiltir lo en ‘leasehold’ i kapab ganny servi koman sekirite kont en loan ziska lavalan SR 350,000. Nou rekonnèt ki i annan en gran valer dan later largrikiltir, e ki tel later i an demann. An menm tan, nou rekonnèt ki bokou fermye i annan limitasyon dan lezot sekirite ki zot kapab ofer kont en ‘loan’. Alor, nou pe ogmant lavalan loan ki kapab ganny sekirize avek later lagrikiltir ‘leasehold’ pou vin SR 850,000, pourvi sa i reprezant pa plis ki 70% valer sa later. Nou pe osi ankouraz transformasyon dan sekter lagrikiltir, e an linny avek sa, nou pe fer sir ki bann term tel ki ‘agro-tourism’ e ‘agro-forestry’ i ganny enkli dan sa skim e byen defini pou permet bann tel proze ganny finanse

anba ADF. Bann “specialised vehicles” - set a dir bann vekil ki bezwen formasyon spesifik pou fer marse e ki ganny servi pou lagrikiltir, pou osi ganny kouver.

Dan bidze 2025, en sonm SR 5 milyon pou ganny azoute dan sa fon ki pou siport sa SR 63 milyon ki Gouvernman ti mete an 2024. Aparti 2026, alokasyon bidzeter anba sa fon pou monte e vinn SR 30 milyon par an.

Sa soutyen finansyel ava ede siport nou bann fermye anvi son bann kondisyon preferansyel. Par egzantp en loan ziska SR3 milyon son to lentere i 2.5% e pour en ‘loan’ par lao SR 3 milyon, to lentere i 5%. Maksimonm peryod repeyman i 12 an. Nou ekspekte ki sa fasilite finansman i a ed fermye pou devlop zot proze pou kontinyen ogmant prodiksyon lokal.

Msye Spiker, i bon fer note ki dan bidze i enkli sa sibvansyon pou fermye ki prodwi;

- lavyann poul ki SR 2.30 par kilo.
- lavyann pork ki SR 6.50 par kilo.

Tandis i annan osi sibvansyon lo kou labatwar, kot ozordi i kout SR 500 pou touy en koson kot labatwar. En fermye i pey SR 200 e gouvernman i sibvansyon SR 300 e pour lavyann poul, sa fre labatwar i kout SR 7 ozordi, kot gouvernman i sibvansyon SR 4 e fermye i pey SR 3.

An plis ki sa, gouvernman i osi sibvansyon fre transportasyon pour manze zannimo avek ‘layer chick’ sorti Mahe pou fermye Praslin ek La Digue.

Dan sekter lagrikiltir gouvernman in konstrir en nouvo batiman resers e sa in kout SR 9.2 milyon. In annan renovasyon lo sant zenetik pou elevaz zannimo ki’n kout SR 3 milyon. In annan amelyorasyon servis laboratwar ek klinik veteriner pour en lavaler SR 2 milyon, e konstriksiyon semen kot serten laferm ki’n ariv anviron SR 10.7 milyon.

Avek bi kontinyen investir dan sa sekter, en alokasyon bidze SR 32.6 milyon pe osi ganny fer pour bann diferan proze lagrikiltir pour lannen 2025. Sa i pou enkli bann proze swivan;

- SR 6.5 milyon pour konstriksiyon biro lagrikiltir Union Vale;
- SR 2.5 milyon anver proze semen;
- SR 3 milyon pe ganny bidzete pour sistenm irigasyon

- SR 8 milyon pou konstriksiyon nouvo labatwar lo Mahe, ki pou baze lo zone 18 Providence
- Renovasyon Bazar Victoria in demare depi 2023 e en alokasyon bidzeter SR 3.2 milyon in ganny mete pour lannen 2025.

## **24. Lord ek Lape**

Msye Spiker, pour nou tou kontinyen viv byen, epanouir, e kontinyen progresse, koman en nasyon, nou bezwen asire ki i annan lord ek lape ki rennyen dan nou pei. San lord ek lape tou nou lakonplisman pa pou abouti dan naryen. I pour sa rezon ki enn bann sekter priyorite dan nou Plan Devlopman Nasyonal 2024/2028 i promouvwar Lord e Lape.

Pour lannen 2025, Minister Zafer Entern pe ganny en bidze SR 743.4 milyon. Departman Imigrasyon ek ‘Civil Status’ in akonpli bokou pandan sa lannen, sirtou an servi teknolozi pou ofer zot servis a zot kliyan. Zot in lans kart idantite vertyel lo platform ‘SeyID’ pour tou endividi ki annan permi pou reste Sesel. Zot in osi entrodwir ‘CertExpress’ ki en platform elektronik ki ed tou sitwayen Seselwa pou ganny en sertifika nesans, maryaz ouswa lanmor san bezwen vizit sa Minister.

An 2022, Sesel ti entrodwir son paspor biometrik. An 2024, sitwayen Sesel ki reste Lafrans, Grande Bretagne ek Lemirat Arab Ini pe kapab fer zot laplikasyon e kolekte zot paspor dan sa bann pei menm. An 2025 sa servis pou ganny enplimante pour nou bann sitwayen Ostrali ek Kanada.

En lot proze ki gouvènmman pe travay lo la se anrezistremman nesans. Dan plas fer sa paran deplase pou vin kot biro lanrezistremman pandan ki sa manman i dan son konze maternite, tou keksoz i kapab ganny fer dan lopital.

Msye Spiker, dan sa sekter lord ek lape pour lannen 2025, gouvènmman pou envestir SR 103.9 milyon dan sa bann proze swivan;

- Konstriksyon kordgard Perseverance i dan staz prokirman e pou konmanse an 2025. En sonm SR 9 milyon pe ganny bidzete;
- Renovasyon kordgard Baie Ste Anne Praslin pou konplete dan premye kar 2025 e in ganny en alokasyon SR 2 milyon;
- Konstriksyon akomodasyon pour travayer departman lapolis ki pou konmanse an 2025 - SR 3.4 milyon
- Konstriksyon fasilite ‘Marine Police’ - SR 43.9 milyon

- Travay kontinyasyon lo ‘Maximum Security Prison’ ki nou ekspekte konplete an 2025 - SR 5.5 milyon
- Premye faz sant rimann pou konplete an Novanm 2024. Konstriksyon pou dezyenm faz pou demare an 2025 e en sonm SR 5 milyon in ganny prozekte; e
- Konstriksyon en nouvo batiman pou medikal e lakwizin pour Departman Prizon - SR 10 milyon.

## **25. Revizyon dan Polisi Taks**

### **25. 1 Revizyon striktir taks lo saler ek benefis non-moneter pou lentrodiksyon en deklarasyon taks par bann endividi**

Msye Spiker, aprezan nou ava bouz lo bann nouvo polisi taks ki gouvènmman pe al entrodwir. Premyèman i annan taks lo saler ek benefis non-moneter ki ti entrodwir an Zilyet 2010 apre ki dediksyon sekirite sosyal lo saler ti ganny aboli. An semoman sa to taks ki progresiv i ant 0 a 30%.

14an plitar gouvènmman pe vin avek en lot faz reform lo taks lo saler ek benefis non-moneter pou lentrodiksyon en deklarasyon taks par bann endividi. Rezon pour sa, se ki nou rekonnèt ki bokou endividi pe investir dan zot prop lavenir e osi zot fanmir e retir depandans lo sistenm gouvènmman. Alors, gouvènmman pe travay lo en nouvo striktir taks lo saler pou entrodwir bann dediksyon parey depans ki sa bann endividi i fer lo lekòl prive zot zanfan, depans lasante ki zot fer, kontribisyon adisyonnèl lo pansyon volonter, lentere ki zot peye lo loan lakaz, okenn lasirans ki zot pran pour medikal ouswa lakaz, e lentere ki zot peye lo bann loan edikasyonnel. Msye Spiker, sa bann striktir parey i egziste dan bann lezot pei. Sa nouvo striktir pou ganny fer an de faz:

- An 2026, tou bann endividi pou anrezistre avek Komisyon Reveni Sesel.
- An 2027, nou pou konmans sa nouvo striktir taks lo saler ek benefis non-moneter pou lentrodiksyon en deklarasyon taks par bann endividi e anmenn bann dediksyon an fors.

Lannen 2025 pou dedye konman konsiltasyon e preparasyon ek sekter prive, afen ki tou travayer i konpran byen sa reform. Nou bi se pou senplifye e retir okenn komplikasyon, sirtou an servan sistenm teknolozi pou fasilite sa reform.



## **25.2 Retir ‘Withholding taks’ ki aplikab lo bann lenvestisman dan Sektor Lekonomi Nimerik pour senk an.**

Msye Spiker, gouvènmàn pe kontinyen ankouraz plis bann lakonpanyen pou servi teknoloji pli avanse ki nou a kapab donn en servis pli aksesib nou popilasyon. Sa i touzour anlinny avek nou stratezi transformasyon nimerik.

Alors pou ankouraz bann lezot lenvestisman sorti dan bann lezot pei dan sektor lekonomi nimerik, e osi akseler lenvestisman dan devlopman teknoloji, gouvènmàn pou retir ‘withholding taks’ 15% ki aplikab ozordi lo bann servis teknikal ki ganny donnen par bann lakonpanyen aletranze dan sektor lekonomi nimerik. Sa egzansyon pou dir pour 5 an. Nou enplor bann lakonpanyen pou pran sa benefis pour sa prosen 5 an e investir dan teknoloji.

## **25.3 Revizyon dan ‘accelerated amortisation’ pour bann lenvestisman dan ‘software’ dan Sektor Lekonomi Nimerik pou ariv trwa zan.**

Nou osi pou revwar ‘accelerated amortisation’ pour bann lenvestisman dan devlopman teknoloji prensipalman ‘software’. ‘Accelerated amortisation’ i en metod ki ganny servi dan biznes taks pou dedwir en pli gran porsyon son depans dan bann premye lannen son lenvestisman.

Pou azout en lot benefis dan sektor lekonomi nimerik e ankouraz plis lenvestisman dan sa sektor, gouvènmàn pou enplimant sa ‘accelerated amortisation’ pour bann lenvestisman dan devlopman teknoloji prensipalman ‘software’, pou ariv 3 an selman. Sa benefis pou selman dir pour en peryod 5 an.

## **25.4 Retir ‘Withholding tax’ lo lentere ki bann endividi i resevwar lo bann lenvestisman dan bann ‘fixed deposits’ avek bann lakonpanyen finansyel**

Msye Spiker, ozordi i annan bann lenstriman finansyel ki ‘withholding taks’ i aplikab ziska 15% lo sa lentere. Avan ki en labank komersyal i pey sa endividi son lentere, sa labank komersyal i dedwir sa ‘withholding taks’ e pey Konmisyon Reveni Sesel e apre pey sa endividi sa diferans.

Ozordi endividi ki investir dan bann lakonpanyen e ganny peye en ‘dividend’ ouswa investir dan ‘treasury bills ou bonds’, zot ganny peye sa lentere ouswa ‘return’ san ki ‘withholding taks’ i aplikab lo sa bann kalite lenvestisman. Alors sa

endividi i resevwar son ‘return’ lo sa lenvestisman an antye san okenn dediksyon pour taks.

Msye Spiker pou ankouraz plis opsyon pou investir dan bann lezot lenstriman finansyel par bann endividi, nou pe retir ‘withholding taks’ 5% lo bann ‘fixed deposits’ ki bann endividi i investir avek bann lenstitisyon finansyel.

## **25.5 Revi dan alawenns personnel lo erport**

Msye Spiker, gouvènmman pe reviz alawenns personnel lo komodite ki en vwayazer i kapab antre Sesel dan pei. Ozordi sa limit i SR 5000 pour en vwayazer par lao 18an e SR 3000 pour enn ki par anba 18an. Sa i nepli reflekte larealite ozordi anvi sanzman ki’n annan dan pri.

Baze lo bann norm enternasyonal e pri komodite gouvènmman pe reviz regilasyon ‘customs management (passenger allowance)’ ek lezot lezisasyon. Nouvo alawenns personnel en vwayazer pou konm swivan;

- En vwayazer pou aprezan kapab antre avek en lekipman elektronik ki enkli en telefonn portab, ‘laptop’ ouswa tablet;
- Bann lezot komodite pour en lavalè SR 15,000 pour bann vwayazer par lao 18 an; e
- Bann lezot komodite pour en lavalè SR 8,000 pour bann vwayazer par anba 18 an;

Sa pou pran lefe le premye Zanvye 2025.

## **25.6 To Taks lo bann Antite ki ofer Servis Byen Vertyel ouswa ‘Virtual Asset Providers Licensees’ anba lalwa taks biznes**

Msye Spiker, an Septanm 2024, sa lalwa ki met sa lankadreman laysenns pour bann antite ki ofer servis byen vertyel, ti vin an mars. Sa bann antite i annan ziska le 31 Desanm 2024 pou fer en aplikasyon pour en laysenns avek Lotorite Servis Finansyel.

Gouvènmman pou aplik en to taks 1.5% lo ‘assessable income’ lo tou bann antite ki ofer Servis Byen Vertyel. Sa to taks i menm to taks ki egziste ozordi pou bann antite ‘securities dealers’ dan sekter finansyel.

## **25.7 Lamannman dan Lalwa Taks Valer Azoute ‘Value Added Tax’**

Msye Spiker, apre konsiltasyon ek sèkter prive, Gouvernman pe anmenn lamannman dan lalwa taks valer azoute, pou fer sir bann provizyon anba sa lezislasyon i pli kler pou enterprete.

Premye konponan se pou adres konsern e fer li pli kler ki ‘levies’ i reste endepandan avek evalyasyon bann lezot taks. Pou osi annan lentrodiksyon en ‘input tax credit schedule’ pou tranzaksyon ki egal ou par-lao SR 50,000. Nou osi pou revwar prosedir ‘refund’ ki enkli akimilasyon kredi pa plis ki 3 mwan. Bann prosedir pou anrezistre en biznes anba sistenm volonter, pou ganny revwar avek lentansyon pou detekte okenn ka frod ouswa reveni ki kapab pa ganny kolekte. Sa bann lamannman pou osi entrodwir en peryod tranzisyonnel ki bann biznes i kapab sorti anba sistenm VAT.

## **25.8 Ranforsi Lalwa Ladministrasyon Reveni**

### **i. Ranforsi Lezislasyon pou Bord ki govern bann lazans taks e ladwann ‘TACAB’**

Msye Spiker, nou pe osi al ranforsi lezislasyon Bord ki govern bann lazans taks ek ladwann, mye konni koman TACAB. Lentansyon sa bann lamannman se pou revwar bann provizyon pou ranforsi plis pouvwat Bord TACAB. Sa i ava ede ki TACAB a kapab fer en lenvestigasyon ler in resevwar en alegasyon sorti kot en biznes ouswa Komisyon Reveni Sesel. Souvandfwa, en lazans ki donn servis taks en biznes, i fer malonnet e pa soumet bann dokiman nesaser kot SRC pour son kliyan. Sa i fer ki sa kliyan i bezwen pey bann sirsaz. En kod kondwit pour sa bann lazans ek bann sanksyon pou ganny etabli. E osi bann provizyon konman en lazans i kapab ganny sispann.

### **ii. Ranforsi bann lezot provizyon anba Lalwa Ladministrasyon Reveni**

Msye Spiker, gouvernman pe al ranforsi bann lezot provizyon anba Lalwa Ladministrasyon Reveni. Premye konponan se pou donn Komisyon Reveni Sesel pouvwat pou enpoz bann sanksyon administrativ pour bann lofans ki ganny komet. Sa bann sanksyon pou moneter e i pou vin en mezir adisyonnèl pou SRC servi kont bann lofans ki pe ganny komet.

Dezyenm konponan bann lamannman pou relye ek proses ki ganny servi pou ‘recover’ det ki en ‘taxpayer’ in akimile. En biznes i kapab obzekte en desizyon si zot pa satisfè avek sa desizyon. Responsabilite i lo sa biznes pou prouve ki sa analiz ki SRC in fer pa zistifye baze avek bann dokiman konkret. Me souvandfwa dokiman adisyonnèl i ganny soumet par bout zis pou retard peyman dapre analiz ki’n ganny fer. Alors, lamannman pou ganny propoze pou fer monte kantite zour nou donn en biznes pou soumet en lobzeksyon. Sa a sorti 60 zour pou vin 90 zour. Nou pe osi entrodwir kantite letan ki Komisyon Reveni i annan pou travay lo sa lobzeksyon ler zot in resevwar. Sa i 120 zour. Nou pe osi enkli bann provizyon pour en biznes pey porsyon sa det ki pann ganny obzekte.

## **25.9 Ranforsi Lalwa Taks Biznes**

Msye Spiker, an Desanm 2022, en revè ti ganny fer lo bann benefis non moneter anba lalwa taks lo saler e non-monmeter. Alors depi Zanvye 2023, sa bann benefis i ganny takse lo sa kou aktyel ouswa lo valer takse dapre sa lalwa. En biznes i selman kapab dedwir sa bann benefis non monmeter anba lalwa biznes taks, selman lo valer kin ganny takse anba katriyenm ‘schedule’ taks lo saler e non-monmeter. Alors nou pou propoz lamannman pou fer ki sa kou aktyel i ganny kouver osi dan depans ki kapab ganny dediksyon anba lalwa taks biznes. Dan bann lenstans kot sa kou aktyel i pa kler, sa valer ki’n ganny servi anba katriyenm ‘schedule’ i kapab ganny servi.

Anba lalwa taks lo biznes, i annan bann depans ki ou pa kapab fer dediksyon anba ou reveni biznes. Sa i enkli taks biznes ki oun peye. Me nou bezwen klarifye ki bann lezot taks parey ‘tourism marketing’ taks, taks valer azoute, e taks ki oun peye lo saler e non-monmeter pa kapab ganny azoute dan ou depans osi.

An Zanvye 2023, nouvo provizyon pour ranplas seksyon 54 dan Lalwa taks biznes lo ‘Transfer Pricing’ ti vin an viger. An Oktob 2023, regilasyon anba lalwa taks biznes pour bann dokimantasyon ‘Transfer Pricing’ ti ganny pibliye. Baze lo sa bann provizyon, Komisyoner Zeneral kot SRC ki determin sa benefis ‘transfer pricing’. Okenn obligasyon pa ganny mete lo sa biznes pou vwar si en azisteman avek son deklarasyon taks i bezwen ganny fer menm si nou rezim taks i baze lo en ‘self-assessment’. Alors bann lamannman pou ganny propoze pou klarifye sa bann provizyon. En lamannman pou osi ganny propoze pou entrodwir en ‘transfer pricing schedules’, en ‘schedule’ depresyasyon e osi en ‘schedule’ pou kapab vwar bann peyman an deor Sesel.

## 26. Konklizyon

Msye Spiker, an konklizyon, mon oule retourn lo konmansman mon diskour, kot mon'n met lanfaz ki atraver tou bidze ki nou gouvènmàn in travay lo la, in montre klerman ki nou annan en stratezi tre kler pour nou pei. Nou reste touzour responsab e disiplinè dan nou depans. Nou demann avek tou dimoun pou travay dir pou kontinyen fer agrandi nou lekonmi. Ler lespas fiskal i permet nou redistribye sa sikse avek tou dimoun. Nou pou kontinnyen lo sa menm trazektwar.

Msye Spiker, mon kapab dir avek pep Seselwa ki Bidze 2025, i enn ki Pozitiv, ki adres e ki pe tous tou sekter nou sosyete. Bidze 2025 i laprev ki gouvènmàn i annan en stratezi kler, realistik e konnen ki i pe fer. Koman en nasyon nou bezwen kontinnyen lo sa semen pozitive.

Msye Spiker, mon oule remerci Prezidan La Repiblik, Msye Wavel Ramkalawan pour son gidans ek sipor dan formilasyon sa bidze, kot in ekout byen e valoriz ekspertiz teknisyen dan nou Ladministrasyon.

Mon osi remerci Vis Prezidan, tou mon bann koleg Minis, bann minister, departman ek lazans ki'n kontribye ver preparasyon Bidze 2025.

Mon osi remerci Lasanble Nasyonal pour zot sipor pandan lannen.

Pour tou Seselwa, delapar gouvènmàn mon osi dir zot mersi pour zot travay dir pandan sa bann dernyen lannen ki'n ede relans nou lekonmi e ozordi zot pe zouir sa sikse.

Pour staff mon Minister, mon'n toultan dir e mon pou kontinyen repete ki zot devouman ver zot travay e zot nivo profesyonalizm i 'second to none'. Delapar Prezidan e tou manm sa Ladministrasyon mon dir zot en gro mersi.

Msye Spiker, mon fini parey mon ti konmanse "ozordi nou dan en sitiasyon kot nou kapab prezant pli gro bidze dan listwar Sesel. Msye Spiker sa in arive dan mwens ki 5 an. En bidze ki donn avek nou pep benefis nou travay e osi met disponib larzan pou envestir dan lenfrastruktir ekonomik ek sosyal ki a benefis nou pei pour sa bann lannen e deseni ki pe vini."

**Avek Sa, Msye Spiker, mon rekonmande ki sa, “Appropriation Bill 2025”  
pour en bidze SR 11,901,621,045 pou otoriz depans dan ‘Consolidated Fund’  
pour lannen 2025, i ganny aprouve.**

**Mersi Msye Spiker.**